

Marcos Jesú^snoa Yoikĩ Keneni

*Juan Maotista tsõa istomaxõ ato yoini
(Mt. 3.1-12; Lc. 3.1-9, 15-17; Jn. 1.19-28)*

¹ Ë mato meka shara yoinõ Jesucristoõnoa. Nã Jesucristo Niospa Fakekõi.

² Afetĩama nã Isaías Niospa shinãmanaino Jesucristoõnoa yoikĩ kirika keneni iskafakĩ:

Mĩ nai mēranoax nãmã fotoyoamano nã ěfe meka yoimis ě atoki rekē nĩchixii mĩõnoa ato yoinõ, itipinĩsharanõfo chipo mia nikasharaxikani kiki, ixõ Epa Niospa ãfe Fakeõnoa yoinino Isaías keneni.

³ Askatari anã keneni iskafakĩ:

Tsõa istoma anoxõ yorafo yoixii akiki feaifono iskafakĩ ato yoixii nã ěfe meka yoimisto ato yoixii iskafakĩ: “Itipinĩsharakãfe. Mã chaima nõko Ifo oi kikĩ. Mãto chaka xatekãfe isharaxikãki,” ixõ ato yoixii, ixõ Juanoa yoikĩ Isaías kirika keneni.

⁴ Nãnorikõi Juan ato yoini tsõa istomaxõ yorafo ato maotisafayanã. Ato iskafakĩ yoiyanã: “Anã Nios shinãkãfe mãto chaka xateyanã ě mato maotisafanõ Epa Niospa mãto chaka mato soaxonõ,” ixõ Juan ato yoini.

⁵ Nãskakē keyokõi Judea anoax feaifono, Jerusalén anoaxri fenifo, ato yoiaito nikai fekani. Nãnoxõ a afara chakafamisfo yoiiaifono, Juan ato maotisafapani faka Jordán anoxõ.

⁶ Akka Juan ãfe rapati kamĩcho fichi kishi faxõ safepaoni. ãfe sitorari fichi koiro safepaoni. Nãskaxõ tseo pipaoni, fonari apaoni.

⁷ Nãskaxõ Juan ato mēxotaima yoipaoni: “Nã ea keskarama mã chaima oi kiki, nã sharafinakõia. Aato afama mĩshti fatiro, ã atiro ma keskara. Akka ã afaama,” ixõ ato yoipaoni Jesúsnoa yoikĩ.

⁸ “Akka ã mato fãka mēra ikimapakea maotisafakĩ. Akka nã rama oaito ãfe Yõshi Shara mato mēra naneyoi,” ixõ Juan ato yoini.

Juan Jesús maotisafani faka Jordán anoxõ
(Mt. 3.13-17; Lc. 3.21-22)

⁹ Nãskano Jesús kani Nazarete anoax, Galilea mai ano. Nãnoxõ faka Jordán anoxõ Juan ato maotisafani.

¹⁰ Nãskafaino Jesús fakanakinoax fininãkafã õia nai fepekemeaito õini. Akiki Niospa Yõshi Shara fotoiyoi oa rifi keskara oni.

¹¹ Nãskaino nai mēranoax mekaito nikani iskafakĩ yoiaito: “Mĩ ãfe Fakekõi, ã mia noikõi. ã mikiki inimasharakõi,” ixõ yoiaito nikani.

Satanás chakata Jesús afara chakafamapaini
(Mt. 4.1-11; Lc. 4.1-13)

¹² Nãskata Niospa Yõshi Sharapa Jesús iyoni tsõa istoma ano.

¹³ Nãri cuarenta nia ini, yoinãfo mēra. Nãrixõ Satanás afara chakafamapaiyaito ãfe ãjirifãfe kex-enifo.

Galilea anoxõ Jesús ato yoikĩ taefani
(Mt. 4.12-17; Lc. 4.14-15)

¹⁴ Akka mã Juan karaxa mēra ikimaitafono Jesús kani Galilea ano Niospa meka shara yorafo yoikai.

¹⁵ Ato yoikĩ is kafani: “Nõko Ifo Nios mã chaima matoki oi kiki, xanĩfofinakõi a ixii. Mãto chaka xatekãfe anã Nios nikakõisharaxikakĩ. ãfe meka sharari nikakõikãfe chanĩmara fayana.”

Jesús cuatro feronãfake kenani tarafanãfãne foe fimisfono ãfe inakõi inõfo

(Mt. 4.18-22; Lc. 5.1-11)

¹⁶ Ato askafakĩ yoita Jesús Galilea ãa kesemẽ kani. Kakĩ fichini Simón yafi onefetsa Andrés. Nã rafeta tarafana fimisfo inifo, ato tarafanãfã faka naki poteaifãfe.

¹⁷ Jesús ato yoini is kafakĩ: “Efe fokãfe. Mãfi tarafanãfãne fimiskĩ. Mã foe ichapa rasi tarafanãfãne fiai keskari fakĩ is karatĩari mã ekeki yora ichapa efexii ã ato Ifo inõ,” ixõ Jesús ato yoini.

¹⁸ Ato askafaino tarafanãfã fafaikani afe fonifo.

¹⁹ Anã orishta fãi katapaikĩ Jesús õia Santiago onefetsa Juan fe nia ini. Nã rafeta ato apa feta kanõa nakixõ tarafanãfã itipinĩ fanifo, kishifakãkĩ.

²⁰ Nã raferi Jesús ato kenaino nã rafeta ato apa Zebedeo yafi ãfe inafoya ato nĩchifainifo. Ato kanõari õifainifo Jesús fe fokãkĩ.

Nã feronãfake niafaka nanea ini

(Lc. 4.31-37)

²¹ Jesús aõxõ tãpimisfo fe kaax Capernaúm ano nokoni. Pena tenetitĩa nã ichanãti pexe mẽra Jesús ikikaixõ ato yoikĩ taefani.

²² Ato yoiaito nikakĩ yorafã rasichi Jesús õiketsanifo. “¡Kee! Nikakapo. Nato tãpikĩ finakõia, a Moisés yoikĩ kirika kenenĩ keskara ato tãpimamisfo keskarama, meka sharakõi nato yoi,” fanifo.

²³ Judeofãfe ichanãti pexe mēraxō yora mēra ni-afaka yōshi chaka nanexō Jesús fāsikōi mekafani.

²⁴ Iskafakī yoini: “¿Afeskakī mī noko fekaxte-faiyoamē, Jesús Nazarete anoato? ¿Mī noko a omiskōipakenakafo mēra mī noko potaiyoamē? Ē mia ōimismō, mī sharakōinō Niospa mia nīchiano,” fani.

²⁵ Jesús niafaka yōshi chaka iskafakī yoini: “Askayamafe. Na feronāfake makinoax tsekekaitāfe,” faino,

²⁶ niafaka yōshi chakata feronāfake choamata, fāsikōi mekainākafata a makinoax tsekekaini.

²⁷ Askaito ōikani, yora rasi ratei fetseyanā āa ranā yoināi fetsenifo iskakani: “¿Tsoamē na? Na tāpisharakōixō ato yoiai nā xanīfāfe tāpisharakōixō ato yoiai keskara. Nā niafaka yōshi chakafāferi nikakani ato yoiaito,” ikanax yoinānifo.

²⁸ Nāskakē keyokōichi nikaketsanifo Galilea mai anoxō nā Jesús aka keskara.

Jesús Simón Pedro rayos sharafani
(Mt. 8.14-15; Lc. 4.38-39)

²⁹ Nā ichanãti pexe mēranoax Jesús tsekekaini. Santiagonō, Juannō fonifo, Simón feta Andrés āfe pexe ano.

³⁰ Akka nāno Simón āfe rayos yōxafo yonai raka ini. Nāno rakano Jesús yoinifo.

³¹ Jesús akiki kaxō āfe mīfi fininīfofanaino a yonai koshikōi sharatani. Mā sharaxō pīchani ato pi-maxii.

A isinī ikaifo Jesús ato sharafani
(Mt. 8.16-17; Lc. 4.40-41)

³² Mā xini kaino a isinĩ ikaifoya a niafaka chaka naneafu Jesúski efenifo.

³³ Nāskakē nānoafu keyokōi yorafo ichanānifo nā pexe fepoti anoax.

³⁴ Jesús ato sharafani yora ichapa pae fetsa fetsatapafāfe ikaifono. Niafaka chakafori ato mēra naneano ato makinoa pōtani. Akka Jesús niafakafo mekamanima māmāi tāpiafāfe Jesúsmai Niospa Fakekē.

Jesús ichanāti pexe mēraxō Apa Niospa mekasharaōnoa ato yoini

(Lc. 4.42-44)

³⁵ Mā chaima penaino, Jesús finināka fā pexe rasi mēranoax tsekekaini tsōa istomaxō Apa Nios kīfikai.

³⁶ Mā Jesús ato makinoax penaino kaano Simón āfe rafeafu fe kani Jesús fenaikai.

³⁷ Mā fichikaxō yoinifo iskafakakī: “Keyokōichi mia fenakani,” fanifo.

³⁸ Askafaifāfe nikakī Jesús ato kemani iskafakī: “Nō chaima fetsa ano kanō fokāfe, anoxori nō ato Niospa meka tāpimanō. Nāskakē ē oa,” ato fani.

³⁹ Nāskakē Jesús kafāsapaoni nā Galilea pexefo tii ano Niospa meka shara ato yoifofāsafai ichanāti pexe mēraxō. Fanīma mīshtixō niafaka yōshi chakafo ato makinoa ato potafofāsafai.

Jesús yora rashkishiai sharafani

(Mt. 8.1-4; Lc. 5.12-16)

⁴⁰ Feronāfake fetsa isinĩ iki rashkishi fetseax Jesúski oni. Akiki oxō ratokonō mai chachipakefofā yoini iskafakī: “Ea mīa sharafapaikī, ea mīa sharafatiro,” fani.

⁴¹ Askafaito nikakĩ Jesús shinãkõini, omiskõiaito. Nãskaxõ ãfe mēkemã ramãyanã yoini iskafakĩ: “Ë mia sharafanõ. Iskaratĩa mĩ sharaikai,” faino,

⁴² a rashkishi fetseai koshikõi sharatani. Nãskax sharakõi ini.

⁴³⁻⁴⁴ Mã sharano Jesús nĩchini iskafakĩ yoianã: “Mĩ tsoa yoiki. Akka nã ato Nios kĩfixomis ispatãfe. Nãskaxõ ovejanã fake foxõ inãfe mia retexonõ Moisés yoini keskafakĩ. Nãskaxõ keyokõichi tãpinõfo a mĩ isinĩ imis mã mĩ sharano,” ixõ Jesús yoini.

⁴⁵ Jesús askafakĩ yoifiano, akka nã feronãfake mã kaxõ ato yoifofãsafani. “Õikapo, mã Jesús ea sharafaa,” ixõ ato yoifofãsafani. Nãskakẽ Jesús anã pexe rasi ano ikixõ ato yoitiroma ini. Xafakĩa nini, tsõa istoma ano. Nãskafiaino pexe rasi anoafõ akiki fenifo õifekani.

2

Jesús yora finimisma sharafani

(Mt. 9.1-8; Lc. 5.17-26)

¹ Mã samaraka pishtata Capernaúm ano anã oni Jesús. Mã nokoano, “Mã Jesús anã oa ãfe pexe ano,” fanifo.

² Nãskakata Jesús fe anã ichanãnifo pexe mēraxõ. Jesús nikakani. Pexe ano fospikõikanax ãfe emãiti ninifo ãfe fepoti ano ikitiroxakãkima. Nãnoxõ Jesús ato tãpimani Niospa meka.

³ Mã ato tãpimanaino feronãfake cuatro nokoto-shinifo. Yora finimisma ãfe xefapa efenifo.

⁴ Mã xĩtiafono ikitirofoma, Jesús ano nã yora finimisma efepaiyaifono ikitirofoma ini. A pexe sapa mãnãoxori paitinĩ mãpekaxõ fotomanifo ãfe xefapa

ratakaxõ. Risfi rafeta nexati fãkaxõ a mãnãoxori kini fakaxõ, nã finimisma fotomanifo, ãfe xefapa.

⁵ Jesús ato õikĩ tãpikõia ini. “Naato nõko yama noko sharafaxotiroki,” faifono Jesús tãpini. Nãskafaifono a finimisma Jesús yoini iskafakĩ: “Efe yorashta, mĩ chaka mẽ mia soaxona,” Jesús fani.

⁶ A Moisés yoikĩ kirika keneni keskara ato tãpimamisfãfe ranãrito ano tsoaxõ nikakĩ shinãnifo.

⁷ Nãnoxõ shinãnifo: “¿Afeskai Jesús mekaimẽ iskai? Tsõa noko chaka soaxotiroma. Nios fistichi noko axotiro. ¿Jesús ãa shinãimẽ Nios?” ixõ shinãnifo.

⁸ Askafaiãfe Jesús ato tãpini ãto shinã mẽraxõ shinãifãfe. Jesús ato yoini: “¿Afeskai mã iskara shinãimẽ?” ato fani.

⁹⁻¹⁰ “Akka ea Niospa shinãmani. Nãskakẽ ã mato õimanõ Niosxõ na feronãfake ã sharafatiro. Tsõa iskara atiroma, Niospa shinãmanai fistichi atiro. Nãskakẽ ã na feronãfake sharafa mã tãpinõ Niosxõ ãri ãfe chaka soaxotiro,” ixõ ato yoini. Nãskafata anã yoini feronãfake finimisma,

¹¹ “Fininãkafãfe. Mĩ xefa fifaini, mĩ pexe ano katãfe,” fani.

¹² Askafaino fininãkafani. Fininãkafaxõ ãfe xefa fifaini, ãfe pexe ano kaito keyokõichi õinifo. Nãskakaxõ, “¡Aicho, Nios sharakõi! Na keskara nõ õimisma, sharakõi,” fanifo.

*Jesús Leví ifini aõxõ tãpimis inõ
(Mt. 9.9-13; Lc. 5.27-32)*

¹³ Nãskax Jesús anã kani ãa efapa ano. Anoxõ yora ichapa rasichi õinifo. Nãnoax Jesúski ichanãnifo. Nãnoxõ ato tãpimani.

14 Nãnoax kakĩ Jesús finõfãikĩ Leví* òini, a yonoai ãfe tsaoti mĩsa ano tsaoxõ, ato keyokõi kori fĩaito. Nã Leví ãto kori fĩamis ini ãfe xanĩfo minixiki Roma anoa. Leví Alfeo fake ini. Jesús òixõ yoini: “Leví, efe kafe ã mia tãpimanõ,” fani. Askafaino Leví afe kani.

15 Nãskax Jesús aõxõ tãpimisfo fe kani Leví ato kenano a anoxõ pii fokani. Ato kori fĩamisfo fe yora chakafori a Moisés keneni nikamisfo-mafãferi Jesús feta pinifo. Yora ichapa Jesús fe foafofãinifo. Nãskakẽ yora ichapakõichi Leví pexe mẽraxõ pinifo.

16 Nãskakẽ a Moisés yoikĩ kirika keneni keskara ato tãpimamisfo nãfori fariseofo inifo. Afãfe Jesús òinifo yora chakafo feta piaito. Nãskaxõ a Jesúsxõ tãpimisfo yõkanifo: “¿Afeskakĩ mãto maestro na ato kori fĩxomisfo feta piimẽ? Yora chakafo fetari pii,” ato faifono,

17 Jesús nikaxõ ato yoini: “A sharafãfe notoro fenakanima, a isinĩ ikaifãfemari notoro fenakanima. Akka nã isinĩ ikaifãfe notoro fenakani. Nãskakẽri ã ato yora sharafos kenatapa ikerani ã oama. Nã yora chakafo ã ato tãpimaniyoi ã oanõ,” ato fani.

*Nã foni tenemisfofãfe Jesús yõkanifo
(Mt. 9.14-17; Lc. 5.33-39)*

18 Juan Maotista ãfe inafãfe ãto feyafati ipaoni fisti rasi pikakĩ pipaonifoma foni tenemisfo ipaonifo Nios shara shinãkakĩ. Nã fariseofo nãskarari ipaoni ãto feyafati. Nãskakẽ yora fetsafãfe Jesús yõkanifo tãpipaikakĩ, “Jesús, ¿afeskakĩ mĩ inafãfe mẽxotaima piimẽ? Juan ãfe inafãfe

* **2:14** Leví ane rafeya ipaoni. ãfe ane fetsa Mateo.

foni tenekaninõ Nios shinãsharakakĩ. Askatari fariseofãferi foni tenekaninõ. Akka, ¿afeskai mĩõxõ tãpimisfo askaramamẽ?” fanifo.

¹⁹ Askafaifãfe anã Jesús ato yoini: “Feronãfake ãfiyaino, yorafo ano fisti ichanãkaxõ afara fetsa fetsatapafo afeta pitirofo inimayanã, aicho fakakĩ akiki inimakakĩ. Akka feronãfake ãfi fikĩ foni tenetiroma. Askafixõ inimakĩ pitiro.

²⁰ Akka mã fene rēteafono ãfe yorafãfe shinãkakĩ foni tenetiromo,” Jesús ato fani. (“Nãskakē ē nono ikano inimakĩ eõxõ tãpimisfãfe efeta pimisfo. Akka mẽ naano ea shinãkakĩ tsõa pitiroma eõ noikakĩ,” ato fani.)

²¹ Askata anã fetsa ato yoini: “Tsõa sama fenaya sama xini kishi fatiroma. Nõ askafaino sama fena samama chakanatiromo. Nãskatari sama fenafe sama xini isharatiroma. Nãskakēri nã ē mato yoiai keskara mã nikakõixõ a mã ipaoni keskara anã mã itiroma mãmãi ea nikakõiax. A mã ipaoni keskara shinãmakita nãskax mãto yora fena keskara shara itiro.

²² Nãskarifikĩ tsõa mãmã fata koiro pisha xini mẽra nanetiroma nã mãmãõ faraxakaino toxamãianõ. Nãskakē nã mãmã fata fe koiro pisha chakanatiromo. Akka nã mãto xinifãfe mato yoimisfo keskara fe nã ē mato yoiai keskara osinãtiroma. Nã ē mato yoiai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka osinãtiroma. Nãskakē mã nikapaifi mã shinãsharatiroma. Nãskarifikĩ tsõa mãmã fata koiro pisha xini mẽra nanetiroma nã mãmãõ faraxakaino toxamãianõ. Nãskakē nã mãmã fata fe koiro pisha chakanatiromo. Akka nã mãto xinifãfe

mato yoimisfo keskarafe nã ã mato yoiai keskara osinãtirioma. Nã ã mato yoiai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka osinãtirioma. Nãskakẽ mã nikapaifi mã shinãsharatiroma.”

Nã judeofãfe pena tenetitã Jesúsxõ tãpimisfãfe aros keskara metesfenifo

(Mt. 12.1-8; Lc. 6.1-5)

²³ Jesús aõxõ tãpimisfo fe kani a judeofãfe tenetitã. Tarepa kakĩ ãfe inafãfe aros keskara meteskaxõ fikaxõ pinifo.

²⁴ Nãskafaifãfe fariseofãfe õikakĩ ato iskafanifo: “Õipo. ¿Afeskakĩ mã inafãfe na aros keskara metesfekanimẽ na pena tenetitã tsõa yonotirioma ixõ Moisés noko yoifinino?” fariseofãfe fanifo.

²⁵ Ato askafaifono Jesús ato kemani: “Akka, ¿a nõko xini Davidõnoa kirika kenenifo keskara mã õimismamẽ? ¿David afaa afeska fanimẽ ãfe inafõ feta fonãikõikĩ?”

²⁶ Nãskakẽ David Nios kĩfiti pexefã mẽra ikikaini. Akka nã Nios kĩfiti pexefã anoax Abiatar nã ato Nios kĩfixomisfãfe ãto xanĩfo ini. Akka nã Nios kĩfiti pexefã mẽranoa David pãa pini a pãa tsõa pishta pi-fiatiromano. Akka nã ato Nios kĩfixomisfãfe arese a pãa pimisfo ini. Nãskafekẽ nã pãa David pini a afe foafori ato pikĩni.

²⁷ “A Niospa taefakĩ feronãfake onifani. Askata teneni. Nã feronãfake Niospa tenemani, pena tenetitã yonoyamanõ.

²⁸ Nãskakẽ Niosxõ ã yoitiro na pena tenetitã ãmãi xanĩfokõixõ afeskaimãkai ã yoitiro. Nãskakẽ ã mato yoi ãfe inafãfe afaa chakafakanima

aros keskara meteskakĩ pena tenetitĩa fonãiki finakõikaxõ,” ato Jesús fani.

3

Feronãfake mẽke yõshiya Jesús sharafani
(Mt. 12.9-14; Lc. 6.6-11)

¹ Jesús anã ikikaini judeofãfe ãto ichanãti pexe mẽra. Nãno feronãfake mẽke yõshiya ini.

² Aas õinifo, judeofãferi. “Jesús sharafaimãkai nõ õinõ na pena tenetitĩa,” fanifo yõaxikakĩ.

³ Askata Jesús yoini nã feronãfake mẽke yõshiya: “Fininãkafata ano nife nakirafe,” fani.

⁴ Askata yorafo yõkani: “¿Afaa nõ afeska fatiromẽ pena tenetitĩa? ¿Shara nõ atiomẽ? ¿Chaka nõ atiroraka? ¿Nõ ifitiromẽ? ¿Nõ retetiroraka?” ixõ ato yõkani.

Ato askafaito tsõa kemanima.

⁵ Ato feratexõ Jesús ato õini, yora fetsafoõnoax shinãyamaifãfe. Askatari Jesús shinãmitsani. Shinãmitsaxõ yoikĩ iskafani feronãfake: “Mẽshafe,” fani. Askata nikax mẽshatani. Mẽshatanaino sharatani.

⁶ Askaito õikani fariseofo õitifishkinifo. Tsekefainifo ichanãti pexe anoax. Taefakakĩ shinãnifo: “¿Afeskafoxõ na Jesús nõ retetiromẽ?” fanifo. Herodes ãfe inafõ feta shinãnifo.

Yora ichapa ini ãamãfã ano

⁷ Askata Jesús anã kani aõxõ tãpimisfo fe ãamãfã kesemẽ ano. Nãskakẽ Galilea anoafõ yora ichapa rasi fonifo. Jesús chĩfafainifo.

⁸ Mã yorafãfe nikakanax fonifo, nã Jesús ato sharafaino nikafaikani fonifo Jesús ari. Judea

anoafori, Tiro yafi Sidón anoafori fonifo. Jesús ano nokonifo.

⁹“Kayakōi yorafo fei kiki,” ato fani aōxō tāpimisfo Jesús. “Ea shoi aki fetirofoki, ea kanōa fexokāfe ē nanenō,” ato fani.

¹⁰ Jesús ichapa yora rasi sharafaino, nāskakē na yora isinī ikani akiki fenifo Jesús shināfāikani ramāpaikani ato sharafanō.

¹¹ Nāskaino a niafaka chakafoyafāfe Jesús ōinifo. Nāskakē Jesús fichikanax feopakefofānifo Jesús nāmā. “Jesús mī Niospa Fakekōiki,” niafaka naneafāfe fāsikōi fanifo.

¹² Askata Jesús ato yoini: “Tsoa yoiyamakāfe ē Niospa Fakeki,” ato fani.

*Jesús aōxō tāpimisfo doce feronāfake ifini
(Mt. 10.1-4; Lc. 6.12-16)*

¹³ Nāskata Jesús māchi keya māpeni. Ari kakī aōxō tāpimisfo ichapa ato kenani ato yoixiki arixō tāpinōfo. Askata Jesús ano fonifo aōxō tāpimisfo.

¹⁴⁻¹⁵ Feronāfake doce faxō ato ifini, afe rafeafono ato nīchixiki aōnoa āfe meka shara ato yoitanōfo, nāfāfe yorafo makinoa niafaka yōshi chakafo ato potaxotanōfo. Nāskata nāfo ato aneni, “Ēfe meka yoimisfo” ato fakī.

¹⁶ Nā tii ato ifipakeni fisti rasi. Taefakī Simón ifini. Āfe ane fetsafaxoni, Pedro kenaxiki. Simón ikaino,

¹⁷ Jacobo yafi āfe onefetsa Juan kenani, āto apa Zebedeo ini. Jesús ato ane fetsa kenani Boanerges fakī. Nō askafatiro, “Yora finakōia oa nai tiri ikai keskara” fakī.

¹⁸ Askatari Andrés kenani, Felipe ikaino, Bartoloméri ikaino, Mateori ikaino, Tomásri ikaino,

Jacobo fetsari ikaino, Alfeo fake. Askatari Tadeori ikaino, Simón fetsari ikaino. Na Simón nãskara ipaoni nã yora xanĩfo chakafapaikĩ, potapaikĩ fet-safo feta. Mã ato makinoax ota Jesús fe rafeni.

¹⁹ Askatari Judas Iscarioteri ifini. Nã Judás Iscariote Jesús fe iyopaoni. Nãskaxõ chipo chakafakĩ ato achimani Jesús retenõfo. Nã tii Jesús ifini aõxõ tãpimiskõi inõfo.

Yora fetsafãfe, “Jesús niafakaõxõ ato sharafaira,” fanifo

(Mt. 12.22-32; Lc. 11.14-23; 12.10)

Nãskata mãchifã ariax fotota, ãfe inafõ fe ikikaini pexe mẽra.

²⁰ Anã yora rasi ichanãfatishoni. Askaito õikĩ, yora ichapa õikĩkakĩ, pitirofoma inifo.

²¹ Jesús afe yorafãfe tãpinifo mã pexe mẽra kaano fõkaxõ Jesús anoa ifipainifo. Yoiaifãfe nikakakĩ ifipainifo fõkaxõ Jesús anã shinãsharaima faifãfe.

²² Askatari a Moisés yoikĩ kirika keneni keskara ato tãpimamisfo Jerusalén anoax Jesús ano feafono ato yoini: “Na Jesús nã niafaka chakafãfe ãto xanĩfoõxõ nã Beelzebú ãfe shara miniano aõxõ ãto niafaka põtai,” fanifo.

²³ Jesús nikakĩ ato kemani meka fetsafaxõ: “¿Afeskax Satanás ãa potametiromẽ? ãa itiroma.

²⁴ Nãskakëri yorafo paxkanãkanax ãa ranã retenã keyotirofo. Askatari pexe rasi anoax ãa ranã retenã keyotirofo. Nãskax isharatirofoma ãa ranã retenãtirofo.

²⁵ Fetsari nã nofe yorafo mĩshti paxkanãtirofoma. Paxkanãx keyotirofo.

26 Nāskakēri Satanás āfe inafō fe paxkanātiroma. Paxkanāx keyotiro anā xanīfo itiroma.

27 “Askatari feronāfake mitsisipakōi taefakī metexkere akaxoma tsoa āfe pexe mēra ikitiroma āfe afama mīshti fīaxikakī. Nāskarifiakī nō yora nexaxō āfe afara nō fīatiro keskafakī, nāskarifikī ē Satanás nexaxō Niospa Yōshi Sharaōxō ē Satanás āfe ina pōtatiro.

28-29 “Chanīma ē mato yoikōi, keyokōi chaka Niospa soaxotiro. Askatari keyokōi meka chakari Niospa soaxotiro. Askafixō fētsa yoixō, ‘Jesús Niospa Yōshi Sharaōxō askara ato sharafatiroma, Satanás āfe yōshioxō ato sharafai,’ askafaito Niospa ato āfe chaka soaxotiroma, āto neepakexanō,” ato fani Jesús.

30 Anori yorafāfe yoini: “Jesús yōshi chakaya,” fanifo. Nāskakē Jesús ato yoini Epa Niospa Yōshi Sharaōxō ato sharafai.

*Jesús ōifekani āfe afanō āfe extonō fenifo
(Mt. 12.46-50; Lc. 8.19-21)*

31 Jesús āfe afanō onefetsanō nokonifo a Jesús ano. Mā nokokanax pexe mēra ikinifoma. Xafakīa ninifo pexe emāiti. Nānoxō yora fetsa nīchinifo Jesús yoitanōfo.

32 A Jesús foaketifaya kekanax tsoafāfe yoinifo: “Jesús, mā mī efanō mī extonō nokofo. Mia yōkakamekani,” fanifo.

33 Askafaifāfe ato Jesús kemani: “Ēfe efanō, ēfe poinō, ē ato fistis shināima. Yora fetsafori ē ato shināi efe yora keskarafo. ¿Tsoamē ēfe efa, ēfe extofofori? ¿Mā tāpipaimē tsoamāki ēfe efa, ēfe extofofori? Ē mato yoinō,” ato fani.

³⁴ Askafaxō Jesús ōini a tsoafo. Nāskaxō ato yoini: “Nā ea Ifofaifo, ea nikaifo efe yorafo. Nakīa ēfe extofo, ēfe efafo,” nāskafani.

³⁵ “Nā Niospa fichipaiyai mā akaino Niospa mato fichipaiyai keskarifakī nā ēfe extofo, ēfe chikofo, ēfe efa keskara,” ato fani Jesús.

4

*Jesús ato yoini meka fetsafaxō fimi exe saamis-
noa*

(Mt. 13.1-9; Lc. 8.4-8)

¹ Nāskata anā Jesús ato tāpimani ĩa kesemēxō. Nāskakē yora ichapa ichanānifo Jesús ano. Nāskaifono Jesús kanōa ĩa ketokonō rakano aō naneinīkafanax tsaoni. Akka yorafo ĩa ketokonō tsaonifo.

² Nāskaxō Jesús ato tāpimani afama mīshti meka fetsafaxō. Ato yoikī iskafani:

³ “Ea nikakāfe ē mato yoinō,” Jesús ato fani. “Feronāfake fistichi fimi exe saafoni āfe nōxati mēra kēchoxō fokī.

⁴ Fimi exe saafokaino ranāri fai nēxpakīa pakeaino a kachikirixori peyafāfe pini.

⁵ Nāskata fimi exe ranāri makexfoki pakei fetseni mai shara anoma. Nāskakē samamakōi fimi exe foaipaini.

⁶ Akka mā foaipaiyaito xinī namani, yosipanā, āfe tapokairoko mai mēra kasharakē. Foaikax, samama nani xinī tsasifaano.

⁷ Akka ranāri fimi exe moxafo mēra pakeni. Nāskakē moxafo foaikī namani. Nāskakē fimi exe foaikax fimiyamax nani.

⁸ Akka fimi exe ranāri mai shara ano pakeni. Nāskax foaisharax fimi ichapayakōi ini. Fetsa

treinta fimiya ini. Fetsa sesenta fimiya ini. Fetsari cien fimiya ini.”

⁹ Nāskaxō Jesús ato yoini: “Mā pachoyakī ea nikasharakōikāfe,” ato fani.

Meka fetsafaxō yorafo yoixō a aōxō tāpimisfo xafakīakōi ato yoini

(Mt. 13.10-17; Lc. 8.9-10)

¹⁰ Mā yora ichapa rasi foaifono Jesús ares nēteni, akka nā foafāfema a aōxō tāpimisfo docefo fe nēteafāfe yōkanifo. “¿Afaa mī noko yoipaiamē meka fetsafaxō?” faifono,

¹¹⁻¹² Jesús ato kemani, “Epa Niospa a ika anoxō afe yorafo ato ĩkināi afe keskaramākī ē mato xafakīa yoinō. Akka fetsafo meka fetsafaxō ē ato yoiaki. Akka ōifikakī tāpikanima nikafikakīri nikasharakanima. Nios Ifofakaspakani. Nāskakē Niospari ato chaka soaxotiroma.”

Jesús meka fetsafaxō fimi exe saamisnoa ato yoini ato tāpimasharakōixiki

(Mt. 13.18-23; Lc. 8.11-15)

¹³ Nāskata ato yoini: “¿Nā ē ato meka fetsafaxō yoiai mā tāpīamamē? Akka, ¿afeskakī fētsa nikatiromē?

¹⁴ Nā fimi exe fanamis, nā Niospa meka yoimis keskara.

¹⁵ Akka ranāri yora fetsafo fimi exe fai nēxpakīa pakea keskarafō Niospa meka nikafikani. Akka Niospa meka mā nikafiaifono Satanás ato xītiro peyafāfe fimi exe pitiro keskafakī.

¹⁶ Fetsafo nā fimi exe tokirifo mēra pakeax foaipaiyai keskarafō. Niospa meka nikai akiki inimakōikī nikayotiro.

17 Akka nã fimi exe foaikax ãfe tapo mai mēra ikikēma xinĩ namatiro keskafakĩ. Nãskarifikĩ fētsa taefakĩ Niospa meka nikai inimayotiro. Akka afara chaka nokoaino anã inimatiro ma anã Nios Ifofatiroma, Niospa meka anã ãfe shinã mēra nanekema.

18-19 Akka atiri fimi exe moxafo mēranoax foaikax yositiroma keskarafo. Nãskariatirofo Niospa meka shara nikasharakanaxma. Akka fētsa afarafo shinãkĩ ãfe shinã mēraxõ shinãchakakõitiro. Nãskaxõ kori ichapakõinoikĩ, ‘È kori ichapayax è inimakõitiro,’ ixõ shinãkĩ Niospa meka anã shinãima. Nãskakē Niospa meka nikafikĩ afara fetsafo shinãino afaa Niospa axotiroma.

20 Akka atiri fimi exe mai shara anoax foaikax fimi ichaya ini. Æfe fimi treinta ini, fetsari afe fimi sesenta ini, fetsari ãfe fimi cien ini. Nãskafakĩri fētsa Niospa meka nikakõikĩ nikasharakõitiro. Akka fētsa Niospa meka nikakõisharakĩ nã fimi exe treinta keskara itiro, fetsari nikasharakõikĩ nã fimi exe sesenta keskara itiro, fētsari nikasharakõikĩ nã fimi exe cien keskara itiro,” ixõ Jesús ato yoini.

Meka fetsafaxõ rãpariki Jesús aõxõ tãpimisfo yoini (Lc. 8.16-18)

21 Nãskatari ato yoini. “Akka tsõa rãpari otaxõ kafo mēra nanetiroma, askatari a ika nãmã tsãotiro ma chaikairoko chaxanõ. Akka nõ rãpari fomãkĩa tsãofaano chai chaxatiro. Nãskakē õisharakõitirofo.

22 Nãskarifiakĩ nõ afaa pishta onetiroma, nõ onefiano keyokõichi tãpitirofo. Nãskarifiakĩ a fomãyomisfo Niospa xafakĩa faxii.

²³ Mā pachoyakī ea nikasharakōikāfe,” ixō Jesús ato yoini.

²⁴ Nāskaxō anā ato yoini. “Nikakapo, ẽ mato yoinō. Akka a ea nikakī finasharakōiai, Niospa tāpimasharakōi.

²⁵ Akka nā tāpia nā Epa Niospa tāpimakī finasharakōi. Akka fetsa ẽ tāpisharakōia iflaxō nikamiskēma, askara yora nā tāpia pishta Niospa anā fīatiro,” ixō Jesús ato yoini.

Jesús meka fetsafaxō yoini, fimi exe yositiroōnoa

²⁶⁻²⁹ Nāskata Jesús anā ato yoini. “Epa Nios xanīfāfe noko ĩkinā iskaraki. Nā feronāfāke fimi exe mai shara ano fana keskaraki. Mā fanax oxatiro fakishi, akka penata yonotiro. Nāskakē ifāfe ōiyamaino ares fimi exe yositiro. Nāskakē mai mēranoax fimi exe āfe tapo foaikax yositiro. Mā yosiax efapa itiro, nāskata chipo fimitiro. Nāskata mā fana fimi pachiano, ifāfe topitiro māmāi pachiano,” ixō Jesús ato yoini.

Mostaza exeōnoa yoikī meka fetsafaxō Jesús ato tāpimani

(Mt. 13.31-32; Lc. 13.18-19)

³⁰ Askata anā Jesús ato yoini iskafakī: “Afe keskaramākī Nios xanīfāfe noko ĩkinā ẽ mato yoinō.

³¹ Nā mostaza exe yōra āfe tarepa fanatiro. Akka nā fimi exe pishtakōi fetsafo keskerama.

³² Akka nā fimi exe fanax, mā yosiax efapakōi itiro fana fetsafo keskarama. Nāskakē mā teshpapafai fetseano peyafāfe āfe teshpafo ano naa

fatiro. Nāskarifiakī taefakī ichapatoma Nios Ifofayotirofo. Akka chipo ichapafāfe Ifofakōitirofo,” ixō Jesús ato yoini.

Afama mīshtikiri yoikī meka fetsafaxō Jesús ato yoipaoni

(Mt. 13.34-35)

³³ Nāskatari meka fetsafaxō Jesús ato tāpimani Niospa meka shara keyokōi tāpikanimākai.

³⁴ Akka meka fetsafaxō Jesús mēxotaima ato yoipaoni. Akka nā aōxō tāpimisfo xafakīakōi ato yoipaoni.

Jesús nefe yafi ĩamāfā poo iki meseniaito nishpa fani

(Mt. 8.23-27; Lc. 8.22-25)

³⁵ Mā yātapakeaino nā pena fisti Jesús aōxō tāpimisfo yoini: “Nō okiri ĩamāfā pokefainikanō, fokāfe,” ato fani.

³⁶ Nāskata nāno yorafo nīchifainifo, Jesús iy-oifokakī. Nāskakanax kanoānāfā mēra nanefainifo. Mā foaifono kanōanāfā fētsari fokākī yorafāfe ato chīfafainifo.

³⁷ ĩamāfā pokefainaifono nāno atoki nēfefākōi nokoni. Atoki nēfefākōiaino ĩamāfā pooiyanā kanōanāfā faka fospikōini.

³⁸ Akka Jesús oxano kanōanāfā chipo kamaki rakax, āfe tēkesati kamaki tēkesameax. Oxakē aōxō tāpimisfāfe mōinifo iskafayanā: “¿Ifo, mī noko shināimamē mā nō āsaikai?” faifono,

³⁹ Jesús fininīkafāta, “Nēfe, nishpafe,” fata, “ĩamā nishpafe,” fani.

Nāskafaino nefe nishpani anā feroanima ĩa fe nefe.

⁴⁰ Nāskata chipo Jesús aōxō tāpimisfo yoini. “¿Afeskai mā rateimē? ¿Mā ea chanīmara fasharamamē?” ato fani.

⁴¹ Ato askafaino, akka aōxō tāpimisfo ratekōiyanā āa ranā yoinānifo iskakani: “¡Kee! ¿Na feronāfake afe keskaramē na nefe feta ĩamāfānē ato yoiaito nikaifo?” ikanax yoinānifo.

5

Gadara anoxō Jesús feronāfake makinoa niafaka rasi potani

(Mt. 8.28-34; Lc. 8.26-39)

¹ Nāskata okiri ĩamāfā pokefaikanax nokonifo, Gadara mai ano.

² Nāskata Jesús kanōanāfā makinoax fotopakekafanaino, nā feronāfake niafaka yōshi chaka nanea nāno akiki oni. Nā feronāfake nā maiifo kinīfā mēranoax oni.

³ Mai kinīfā mēra ipaoni. Tsōa nexatiroma ipaoni kaninānā nexafiaifono.

⁴ Akka mēxotaima kaninānā otekere ata metekere ata fafiaifono, kaninā tesa tesa aki fet-sapaoni. Tsōakai afeska fatiroma ipaoni.

⁵ Nāskata penata kafāsata fakishchāiri kafāsapaoni, māchifā ariri māpepaoni maiifo anori kinīfā mēra kapaoni. Nāskata fiisiyanā tokirinī āa tsakamepaoni.

⁶ Akka chai ixō Jesús fichiax, akiki farekeker-anax aō ferotaifi ratokonō mai chachipakefōfāni.

⁷⁻⁸ Fāsikōi yoini fiisiyanā. “¡Ea afeska fayamafe, Jesús! Mī Nios Sharapa Fakekī, ē mia yoi Niospa mia ōi kiki ea omiskōimayamafe,” fani. Nāskai mekani, akka Jesúsmāi iskafakī yoiano:

“Niafaka yōshi chakata, na feronāfake makinoax tsekekaitāfe,” māmāi faano.

⁹ Askafaito Jesús yōkani: “¿Mī afe anemē?” faito, nāato kemani: “Ēfe ane Legión nōmāi ichapax,” fani.

¹⁰ Nāskaxō nā nīafaka Jesús yoini iskafakī: “Mai fetsa ari noko nīchiyamape,” fani.

¹¹ Akka nā chaima māchifā mǎnǎnēxō kochifāfe pinifo.

¹² Nāskakē niafaka yōshi chakafāfe iskafanifo: “Kochifo mēra noko nīchife, kochifo mēra nō ikinō,” faifono,

¹³ kochifo mēra Jesús ato nīchini. Nāskakē niafaka yōshi chakafo feronāfake makinoax tsekekainax kochifo mēra iki fetseni. Nā niafaka chakafo dos mil ini. Nā niafakafo kochifo mēra ikiano kochifo ichoax māfāfā ariax ĩamāfā mēra keyopakeax āsai fetsenifo.

¹⁴ Askaito ōikani nā kochifo kexeafō ichoi fet-senifo. Mā fokaxō a pexe rasi anoafō ato yoinifo, a pexe rasi pasotai ikafori ato yoinifo nā ōiafō keskara. Ato askafakī yoiaifono nikakani yōrafā rasi fenifo kochifo āsaito ōipaikani.

¹⁵ Mā nokokaxō ōiafō nā feronāfake tsoafo ini rapati shara safeax, mā shināsharai a makinoax mā niafaka yōshi chaka tsekeano. Nāskaito ōikani yōrafā rasi ratei fetsenifo.

¹⁶ Nā Jesús niafakafo kochifo mēranao potaito ōikaxō āto kaifo yoifokani fonifo.

¹⁷ Nāskakē yorafāfe yoinifo iskafakakī: “Jesús, nonoax katāfe, nō mia ōipaimakai,” fanifo.

¹⁸ Mā Jesús kanōanāfā mēra naneinākafanaino, nā feronāfake niafakaya ikato, “Ēri mefe kapai,” fani.

19 Nāskafaino, “Maa, mī efe katiroma. Mī pexe ano katāfe. Mī kaifofo fe kaxō mefe yorafō ato yoitāfe a nōko Ifāfe mia sharafa, mīo noikī mia sharafaki,” ixō Jesús yoini.

20 Askafaito nikafaini nā feronāfake kani. Kaxō nā pexe rasi anoafō ato yoini, nā Decápolis anoafō nā Jesús sharafaa keskara. “Aira, nikakapo, ¿afeskax sharamē?” iki fetsenifo.

*Jairo fake xotofake mā nakē Jesús otofani.
Askatari kēromāri Jesús rapati mēeax sharani
(Mt. 9.18-26; Lc. 8.40-56)*

21 Askafata Jesús mā kanōanāfānē ĩamāfā pokeferani oano yōrafā rasi ano ichanānifo. Akka Jesús ĩamāfā ketokonō nēteni.

22 Akka nāno nā ichanāti pexe anoa xanīfo fisti akiki oni, āfe ane Jairo. Jesús fichiax a nāmā feopakekafani.

23 Nāskaxō yoini iskafakī: “Mā ēfe fake xotofake nai kiki. Mī mēkemā ea rāmāxoniyofe, sharax ninō,” ixō yoiaino,

24 Jesús afe kani, yōrafā rasiri afe fonifo. Afe fokakī shoiakī fetsanifo.

25 Nā yōrafā rasi mēra kēro fisti ato fe kani, doce xinia aka ini isinī iki, imi nesemisma ini.

26 Omiskōitiani sharapai notorofō mēra katiani, mā kori potakī mitotiani ini. Tsōa pishta sharafatiroma ini, askatamaroko isinī iki finakōini.

27-28 Nā kēromā Jesúsnoa yoiāifāfe nikani. Nāskakē yōrafā rasi foaifono ato acho kaxō āfe tari kexa ramākani. “Ĕ āfe tari kexa ramākax ē sharatiroraka,” ixō āfe ōiti mēraxō shināni.

²⁹ Nāskaxō āfe tari kexa ramākakaxō meea āfe imi koshikōi nesetani. Nāskaxō āfe yora meea mā sharakōia meeni.

³⁰ Jesús mā tāpixō āfe sharaōnoax nā kēro mā sharano, yōrafā rasi mēra fesoakekafā ato yōkani: “¿Tsōa ea tari ramākamē?” ato faito,

³¹ a aōxō tāpimisfāfe yoinifo iskafakakī: “¿Mī meimamē yorafāfe mia shoiakifetsakaxō mia pitsikinaifāfe? ¿Afeskakī mī noko yōkaimē tsōa ea ramāmē?” ixō fanifo.

³² Askafaifono Jesús aa kemataima ōiakeni, tāpixiki tsōa ramāmākī.

³³ Nāskaino nā kēromā ratei choayanā a sharafaa mā tāpixō, akiki kaxō ratokonō mai chachipakefofā yoini: “Ē mia tari kexa ramākakax mē shara,” ixō yoita a isinī itianiri yoini.

³⁴ Nāskafaito Jesús yoini: “Yōxashta, mā mī shara ea chanīmara faax. Nāskakē tanaima katāfe a mī isinī imis mā mī sharaki,” fani.

³⁵ Jesús mekai xateamano nā xanīfo Jairo pexe anoax fetsafo akiki fēkaxō yoifekani fenifo. Iskafakī yoinifo: “Mā mī fake naaki anā nōko Ifo fekaxtefayamafe,” faifono,

³⁶ akka Jesús ato nikakima, iskafakī nā xanīfo Jairo yoini: “Ratekima, ea chanīmara fafe,” ixō yoini.

³⁷ Nāskaxō Jesús, “Tsoa nofe kaima kiki,” ato fani. Pedro iyota, Santiago iyota, āfe exto Juan iyota ato fani.

³⁸ Nāskata mā Jairo pexe ano nokokaxō ōiafo yorafo oiakani fiisinifo nā fake xotofake manokani mā naano.

³⁹ Nāskata peXe mēra ikikaixō ato yoini iskafakī: “¿Afeskai mā oiai fiisikimē? Na fakekai nakeroko oxanō,” ato fani.

⁴⁰ Ato askafaito yorafāfe Jesús ōsaketsanifo. Askafaifono peXe xaki mēranoa keyokōi Jesús ato kāimani. Nāskaxō apa yafi afa iyoni, a afe foafori afe fonifo. Nāskakanax nā fake xotofake raka ano ikifainifo.

⁴¹ Nāskata Jesús mēkemā mētsoinīfofā yoini: “Xotofakeshta, ē mia yoikai fininīkafāfe,” faino,

⁴² koshikōi fininīkafāni, nā xotofake doce xinia aka ini. Mā fininākafānax kani. Nāskaito ōikani yorafo ratei fetsenifo. “¡Kee, ōikapo! ¿Afeskaxō otofamē?” fanifo.

⁴³ Nāskaxō Jesús ato yoini: “Mā tsoa yoiki na fake xotofake nakē ē otofakī,” ato fani. Nāskaxō, “Pimakāfe na fake xotofake,” ato fani.

6

Jesús Nazarete anoxō nikakaspanifo (Mt. 13.53-58; Lc. 4.16-30)

¹ Nāskata Jesús nānoax kani āfe maikōi ano. A aōxō tāpimisfori afe fonifo.

² Nāskata pena tenetitīa ichanāti peXe mēraxō ato yoikī taefani. Anoxō Jesús ato yoiaito nikakani yorafo āa ranā yoinākani iskanifo: “Aira nikakapo, ¿Fanīxō iskara tāpikī finakōiamē? Tāpikī finakōixō afama mīshtifo fai tsōa atiroma keskafai,” ikanax āa ranā yoinānifo.

³ “¿Akka namamē a mīsa famis? María fake Santiagonō Josēnō Judasnō Simónnō āto ochi. ¿Akka mā ōimamē afe chikofori nono nofe ikafo? Nāskakē nō nikapaiyaitoroko,” fanifo.

⁴ Askafaifono Jesús ato yoini iskafakī: “Na mai tio anoxō a Niospa meka yoimis nikakōitirofo aōnoa yoisharakōiyānā. Akka āfe maikōi anoxō nikatirofoma, āfe kaifofa feta afe yorakōifāfe.”

⁵ Nāskakē arixō afama mīshti fapaifikī anima. Akka a isinī ikaifo fisti rasi ato ramāino sharai fetsenifo.

⁶ Nāskata Jesús shināni: “¿Afeskakī ea chanīmara fakanimamē?” ixō tsōa nikayamaino. Nāskakē pexe rasi chaima ano Jesús kafāsani ato tāpimafofāsafai.

Jesús aōxō tāpimisfo nīchini Nios Xanīfoōnoa ato yoitanōfo

(Mt. 10.5-15; Lc. 9.1-6)

⁷ Nāskata aōxō tāpimisfo doce kenani. Ato kenaino akiki feafono rafe rasi faxō ato nīchini: “Eōxō niafaka yōshi chakafo ato makinoa pōtatakāfe,” ixō ato yoini.

⁸ Nāskaxō anā ato yoini: “Fāi kakī, mā afaa fokiki, akka māto mēsteti fisti mā fotiro. Māto pishari mā fokiki a mā piairi mā fokiki māto koriri mā fokiki.

⁹ Nāskax fotakāfe māto sapato fistiya, māto rapati fetsari mā fokiki.”

¹⁰ Nāskaxō ato yoini: “Mā pexe fetsa mēra ikiāx nāno nētekāfe, nā mā anoax kaitīa.

¹¹ Akka fatora pexe rasi anoxō mato ifikaspayanā mato nikakaspafono anoax tsekekāfe māto taekinoa mapo taa taa ayanā. Mā askafaino tāpinōfo Nios atoki inimayamaino. Ē mato parakima yoi. Nā pexe rasi Sodoma anoāfo feta Gomorra anoāfāfe afara chakakōi fapaonifo. Nāskakē Niospa nā ato omiskōimanaitīa

ato omiskõimaxii. Akka nã mato nikakaspaifo nãfo ato omiskõimaki finakõixii,” ixõ Jesús ato yoini.

¹² Nãskakẽ Jesúsxõ tãpimisfo anoax fonifo yorafo yoifokani. “Mãto chaka xatekaxõ Nios Ifofakãfe,” ato fayanã.

¹³ Ato makinoa ichapa niafaka chakafo potanifo. A isinĩ ikaifoya ato sharafayanã xiniyaxõ ato mãmãyanã.

Juan Maotista nani
(Mt. 14.1-12; Lc. 9.7-9)

¹⁴ Xanifo Herodes nikani Jesúsnoa yoiiafono aõnoa fanĩma mĩshtixõ yoifofãsafafono. Nãskakẽ Herodes shinãkĩ iskafani: “Mã Juan Maotista otoita, nãskakẽ ãfe sharaõxõ ato sharafai,” ixõ shinãni.

¹⁵ Akka fetsafãfe yoikĩ iskafanifo: “Nã ato Niospa meka yoimis Elíaskã,” faifono, fetsafãferi yoikĩ iskafanifo: “Nato Niospa meka ato yoimis, nã afetĩama Niospa meka ato yoipaonifo keskafakĩ,” ixõ yoiiafono.

¹⁶ Nãskafakĩ yoiiaifãfe nikai Herodes iskani: “Nãkã Juan, mẽ ato textemafaitano mã anã otoa,” ixõ shinãni.

¹⁷ Herodes Juan reteyoamano yoikĩ iskafani: “Mĩ exto ãfi fĩayamafe,” feito nikakĩ, Herodes akiki õitifishkiki ãfe sorarofa yoini achikaxõ metexkere akaxõ karaxa mẽra ikimanõfo. Akka nã Herodías Felipe ãfe ãfi ini, nã Felipe Herodes ãfe exto ini. Akka nã Herodes Herodías fe fĩanãni.

¹⁸ Akka Juan Herodes yoini: “Na mũ exto ãfi mũ fĩatiroma,” ixõ yoiaino,

¹⁹ nãskakẽ Herodías Juan noikaspakõikĩ retepaini. Akka retepaifikĩ retetiroma ini.

20 Akka Herodes Juanki rateni māmāi tãpiax Juanmāi feronãfake sharakōikē Nios Ifofasharakōia. Nãskakē kexesharakōini. Nãskakē ãfe ãfinĩ noikaspafiaito nikafikĩ, “¿Ë afeskaimē?” ixõ shinãta, Herodes Juan nikakōini.

21 Akka Herodías mã ato Juan retematiro ini, Herodes ãfe cumpleaños ikaino. Nãskakē Herodes fista akĩ afe xanĩfofoya soraro xanĩfofoya Galilea anoa xanĩfofori ato ichanãfani.

22 Nãskaifono Herodías fake xomaya fista ikaino ikikainax ares yorafãfe õinõfo mairani. Mairaito õikĩ Herodes inimani, a afeta piaifori inimanifo askafanifo. Nãskakē nã xanĩfãfe nã fake xomaya iskafani: “Ea yõkafe a mĩ fichipaiyai, ã mia mininõ,” fani.

23 “Mã na yorafãfe õikani ã mia pãraima a mĩ fichipaiyai keskara ea yõkafe ã mia mininõ,” ixõ yoini.

24 Askafaino nã xomaya kãikaixõ afa yoini iskafakĩ: “¿Ë afaa xanĩfo yõkatirromē?” faito ãfa kemakĩ iskafani: “Juan textexõ ea ãfe mapo inãfe fafe,” fani.

25 Nãskata nã xomaya anã ikikaixõ xanĩfo yoini iskafakĩ: “Iskaratĩa sapaki rãtaxõ Juan Maotista textexõ ea ãfe mapo inãfe,” fani.

26 Askafaito nikai xanĩfo shinãmitsakōini, Juan shinãi. “Akka na yorafãfe nikaifono mē na kēro xomaya yoia. Nãskakē ã ato Juan textemapaiyamafikĩ ã ato textemani,” ixõ shinãni.

27 Nãskakē ãfe soraro nĩchini, Juan textexõ ãfe mapo fixotanõ.

²⁸ Nāskakē soraro karaxa mēra kaxō, Juan textexō āfe mapo sapaki feni. Nāskaxō nā kēro xomaya ināno, nāatori āfe afa ināni.

²⁹ Nāskakē Juan āfe inafāfe nikanifo mā textea-fono. Nāskakē āfe yora fonifo maifaxikakī.

*Jesús cinco mil feronāfakefo ato pimani
(Mt. 14.13-21; Lc. 9.10-17; Jn. 6.1-14)*

³⁰ Mā askano a aōnoa yoimisfāfe afe ichanākaxō yoinifo a atanaifo keskara ato tāpimayanā.

³¹ Askafaifāfe nikakī Jesús ato yoini: “Niri fekāfe tsōa istoma ano nores kaxō nō teneyonō,” ato fani. Yorafo mēxotaima atoki feaifono, nāskakē pitirofoma inifo.

³² Nāskakē Jesús aōxō tāpimisfo fe kanōanāfānē tsōa istoma ano kani.

³³ Akka mā fōkaxō yorafāfe Jesús kaito ōikakī tāpinifo. Nāskakē nā pexe rasi anoafo nā aōxō tāpimisfo fe kai ari ichonifo. Jesús aōxō tāpimisfo fe nokoamatai nokoi taenifo.

³⁴ Mā nokoax Jesús kanōanāfā makinoax fopakekafā ōia yōrafā rasi ōini. Ato fichixō ato shinākōini, nā oa ovejafo ifomais keskara ato ōikī. Nāskaxō afama mīshtifo ato yoisharakōini.

³⁵⁻³⁶ Nāskakē mā yātapakeaino aōxō tāpimisfo akiki fōkaxō yoinifo: “Mā yātapakei kiki nono tsoa ikamakī. Na yorafo nīchife pexe rasi ari yafi a pexe pasotai ikafo ari fokaxō a piaifo fitanōfo,” faifono, akka Jesús ato kemani:

³⁷ “Askakakīma māroko ato pimakāfe,” ato faito, kemanifo iskafakakī: “¿Mī shināimē na yorafo pimaxiki kaxō a piaifo dos cientos kori exenē pāa nō ato fixotanō?” faifono,

³⁸ Jesús ato yoini: “¿Afe tii mā pāayamē? Fokaxō ōiyotakāpo,” ato faito, mā fokaxō ōitakakī yoinifo iskafakakī: “Nāno cinco pāa yafi foe rafes,” fanifo.

³⁹ Nāskakē ato yoini: “Ichanāfaxō na yorafo yoikāfe fasi ano tsaonōfo,” ato fani.

⁴⁰ Ato yoikī askafaifono keyokōi tsaoui fetsenifo, fetsa ano cien ini, fetsa ano cincuenta ini.

⁴¹ Nāskata Jesús cinco pāa yafi foe rafe tso-mainīfofā, nai foisnīfofā Apa Nios aicho fani. Nāskata mā pāa kaxkeketsaxō aōxō tāpimisfo ināni, yorafori ato inānōfo. Askatari foe raferi keyokōi ato inānifo pinōfo.

⁴² Nāskakē mā keyokōichi pikanax māyakōinifo.

⁴³ Nāskakē a chetefaafo pāa yafi foe doce fēta fospikōiya ini.

⁴⁴ A cinco pāa piaifo cinco mil feronāfakefos inifo.

Jesús ĩamāfā femākīa kani
(Mt. 14.22-27; Jn. 6.16-21)

⁴⁵ Mā yorafo pimata Jesús aōxō tāpimisfo yoini iskafakī: “Kanōanāfānē nanekāfe okiri ĩamāfā pokefaitaxikākī Betsaida ano rekē nokotaxikākī. Ē fenakaimakai, ě na yorafo nīchiyonō,” ixō ato yoini.

⁴⁶ Mā yorafo nīchita māchi keya ari arese kani arixō Apa Nios kīfikai.

⁴⁷ Mā fakishaino ĩamāfā nakirafe kanōanāfā ini. Akka Jesús kanima, ares fisti nēteni.

⁴⁸ Jesús ōini aōxō tāpimisfāfe tōfeifāfe nēfēfanē ato katima faino ĩamāfā pooiki mesenikōiaino, mā penaino. Nāskakē Jesús atoki kani ĩamāfā femākīa. Akka ĩamāfā femākīa kakī oa ato finōfainai keskara ini.

49-50 Īamāfā femākīa kaito ōikakī niafakara ixō shinākani. Tai tai inifo. Nāskakē keyokōichi ōikani rateaifono. Akka Jesús ato yoini iskafakī: “¿Afeskai mā rateimē? Ēki rateyamakāfe,” ato fani.

51 Nāskata kanōanāfā mēra naneinākafe, nēfefā nishpafani. Nēfefā nishpafaito ōikakī a aōxō tāpimisfāfe, “¡Kee! ¿Afeskaxō nēfefā nishpafaimē?” fanifo.

52 Akka Jesúsnoa tāpiyonifoma, Jesús afama mīshti fatiroxakī cinco pāa cinco mil feronāfakefo ato pimafiitano. Niospa Fake fiano āto ōiti mēraxō tsōa shinānima, tāpiyonifoma.

Jesús Genesaret anoafo a isinī ikaifo ato sharafani

(Mt. 14.34-36)

53 Jesús aōxō tāpimisfo feta Īamāfā pokefainax Genesaret mai ano nokoni. Nāno Īamāfā ketokonō kanōanāfā nexanifo.

54 Nā kanōanāfā mēranoax fotopakefofānaifono, yorafāfe tāpinifo.

55 Mā tāpikanax peke rasi pasotai ichoi fetsenifo. Nāskakaxō a isinī ikaifo, rātati kamaki rātakaxō ato efenifo Jesús ano.

56 Nā Jesús kai ari fanīma mīshtixō, a isinī ikaifo fai nēxpakīa ato rātanifo. Nāfāfe, “Noko ramāmafe nō mia tari kexa ramākanō,” fanifo. Nā ramāifo tii sharai fetsenifo.

7

Jesús ato yoini afeskai yorafo chakafomakī
(Mt. 15.1-20)

¹ Nāskata fariseofo fe a Moisés yoikī kirika keneni keskara ato tāpimamisfo Jerusalén anoax Jesús ano fenifo.

²⁻³ Nāfāfe ōinifo Jesúsxō tāpimisfāfe mechokomexoma piaifāfe, a āto xinifāfe yoinifo keskayamafono. Nāskakē ato mekafanifo. Akka fariseofāfe keyokōi judeofo āto xinifāfe yoipaoni keska-paonifo. Piamax taeyoi mechomepaonifo chipo pixakakī.

⁴ Akka a afarafo ato miniaifo anoax fekanax, a ato xinifāfe yoinifo keskai mechokomekaxoma pitirofoma. Āto xinifāfe afarafo feyafapaonifo keskai nāfori askapainifo. Āto kechofoya, āto jarafoya āto ochamefetifoya, āto rakoti chokapaonifo āto xinifāfe apaonifo keskara.

⁵ Nāskakē fariseofo feta a Moisés yoikī kirika keneni keskara ato tāpimamisfāfe Jesús yōkanifo: “¿Afeskakī na mĩōxō tāpimisfāfe a nōko xinifāfe yoinifo keskara nikakanimamē na mechokomexoma piaifofaifāfe?”

⁶⁻⁷ Jesús ato kemani iskafakī: “Nā Niospa meka yويمisto Isaías matoōnoa yoini iskafakī:

Na yorafāfe afaa tāpiafoma ato feparapaimisfo. Na yorafāfe eōnoa yoisharafikakī, akka āto ōiti mēraxō ea shināsharafoma. Āakōi ichanākanax fanāikani ea kīfiyanā. A yorafo tāpimanaifo keskarakai ēfe mekama. Āakōi shinākaxō ato yoikani,

ixō Isaías Niospa meka keneni.

⁸ Nāskakē a Niospa yoini keskara mā shinākima, a mātō xinifāfe yoini keskara mā shināmis.

⁹ “Nā mā shināpaiyai keskara fisti mā shināpai.

Nāskakē a Niospa mato yoini keskara mā anā nika-paima.

¹⁰ Akka Moisés yoini iskafakī: ‘Māto epa yafi māto efa nikasharakāfe. Akka a āto apa yafi āto afa chakafaifo ato retekāfe,’ ixō yoini.

¹¹⁻¹² Anori kenekī yoifinino, akka mā yoikī iskafamis: ‘Feronāfāke āfe apa yafi āfe afa yoikī iskafatiro: “Ē mato afaa inātiroma, nā ēfenāfo mē Nios inākī ixō yoitirofo,” ’ mā famis. Nāskata a Niospa yoini anori mā ato yoimisma māto epa yafi māto efa kexeshakāfe ifiano. Akka mā ato yoimis iskafakī: ‘Anā māto epa yafi māto efa mā afaa inātiroma,’ ixō mā ato yoimis. Na shara.

¹³ Nāskakē a Niospa yoini anori yoitama, a māto xinifāfe yoipaonifo anori fisti mā ato yoimis. Nāskaxō afara fetsafo mā famis, Niospa mekakōi mā yoimisma,” ixō Jesús ato yoini.

¹⁴ Nāskaxō Jesús yorafo kenaxō ato yoini iskafakī: “Keyokōichi ea nikasharakōikāfe tāpisharakōixikakī ē mato yoinō.

¹⁵ Nā nō piatokai noko chakana fatiroma, akka nōko shinā mēraxō nō afara chakafo shināito noko chakanafatiro.

¹⁶ Mā pachoyakī nikasharakāfe,” ato fani.

¹⁷ Nāskata Jesús yorafo nīchifaini pexe mēra ikini, nānoxō a aōxō tāpimisfāfe yōkanifo: “A mī yorafo yoia keskara nokori yoife nō tāpinō,” faifono, ato yoikī iskafani:

¹⁸ “¿Afeskakī mārī mā nikasharaimamē? ¿Mā tāpīamamē afara nō piato nōko xaki mēraxō noko chakafatiroma?

¹⁹ Akka a nō piāi nōko ōiti mēra kaima, nōko āto mēra kai, mā nōko āto mēranoax payokomeano

chipo nō aya safatiro.”

“Akka a nō piai chakama, keyokōi shara,” ixō ato yoini.

²⁰ Nāskaxō anā ato yoini: “Akka mātō shināmā shināxō mā afarafo chakafatiro.

²¹⁻²² Nāskakē āto shinā mēraxō shinākakī, yorafāfe afara chakafo shināmisfo. Feronāfakefāfe āto āfima chotaifono, kērofāferi āto fenema chotamamisfo. Nāskata yometsokata, ato retemisfo. Askatari kēro fetsafo kaxefakāta, fetsafo chakafakī, mekafakāta; afara fetsafo chakafakāta, ato pārakāta, a afara apaiyaifo fisti akāta, a fetsafāfe fiati fipaikāta, āa chanīkāta, āa kakapaikāta, askatari shināsharamisfoma.

²³ Nā afara chakafo āto shinā mēraxō shināifo keskafakī nāato ato chakafaxii,” ixō ato yoini.

Xotofake judeoyamafixō Jesús chanīmara fakōini (Mt. 15.21-28)

²⁴ Nāskata nānoax pexe rasi Tiro ano Jesús kani. Mā kaax pexe fetsa mēra ikini, ano ikikē tsōa tāpiamanō. Akka nāno ikiax onetiroma ini.

²⁵ Nānoa koshikōi tāpinifo, nāskakē nā fake xotofake niafaka naneato āfe afa Jesús ano kaxō a nāmā ratokonō mai chachipakefofāni.

²⁶ Nā kēro xoko fetsa Sirofenicia mai anoa ini. Nāskakē Jesús ano kani. Kaxō yoikai iskafakī: “Ēfe fake xotofake makinoa niafaka yōshi chaka potaxōfe,” fani.

²⁷ Askafafiaito nikakī Jesús yoini iskafakī: “Āa fakefāfe pikī taefayonōfo. Enefe, a fakefāfe piai fiāxō nō paxta inā, askarakai sharamaki,” faito,

²⁸ nā kēromā kemani iskafakī: “Ēje Ifo, a mī ea yoiai keskara mē nikai. Akka paxtafāfe pitirofo a

fakefāfe piai āfe potofu mīsa nāmā keyo pakeaito,”
faiito,

²⁹ Jesús yoini iskafakī: “Chanīma, mī ea kemasharakōia. Nāskakē mā mī katiro, mī fake xotofake makinoax mā niáfaka yōshi chaka mā tsekeaki,” fani.

³⁰ Nā kēro mā āfe peXe ano nokoxō ōia āfe fake xotofake raka ini, a makinoax mā niáfaka tsekeano.

Jesús feronāfake pāstokōi ita mekamisma sharafani

³¹ Jesús Tiro mai anoax tsekekainikakī, Sidón yafi peXe rasi Decápolis finōfaini kaax, Galilea iamāfā kesemē nokoni.

³² Nāno yorafāfe feronāfake mekamisma ita pāstokōi iyonifo. Mā iyokaxō yoinifo iskafakakī: “Mī mīfi māmāfe nikamismaki pāstokī,” faifono,

³³ Jesús a fisti ori iyoni, yorafo makinoa. Nāskaxō āfe mīfi āfe pacho kini mēra meeni. Askafatari āfe mifiki kemo mechota āfe ana ramākani.

³⁴ Nāskafata nai foisnīfofā xakaita yoini iskafakī: “Efata,” fakī. (Akka nōko mekapa nō yoimis iskafakī: “Papeita nikasharafe,” faki.)

³⁵ Nāskafaino, nā pāsto āfe pācho nikasharakōini. Āfe anari sharakōitani, nāskax meka sharakōini.

³⁶ Nāskafata, “Mā tsoa yoiki,” Jesús ato fafiaino, askatamaroko ato yoikī finakōifofāsa fanifo.

³⁷ Nāskakē, “¡Kee, ōikapo! ¿Afeskaxō iskara sharafaimē?” ikata iskafakī yoinifo: “A pastofu ato sharafaino mā nikakani, a mekamisfomari mā ato sharafaino mā mekakani,” ikanax yoinānifo.

8

Jesús cuatro mil feronãfakefo pimani
(Mt. 15.32-39)

¹ Nãskata pena fetsa yorafã rasi anã Jesúski fenifo ãfe meka nikai fekani. Nãskata a piaifori ano afaa inima. Nãskaifono Jesús aõxõ tãpimisfo kenaxõ yoini iskafakĩ:

² “Ë na yorafo shinãkõi, nono tres nia mã efe ikafono, nonoxori afaa pikanima. A piaifo mã keyoa.

³ Akka afaa pimaxoma ãto pexe ano ã ato nĩchiano, fonãikani afaa pikanaxma fai nẽxpakĩa paketirofo. Atiri chai inoax feafoki,” ato faino,

⁴ a aõxõ tãpimisfãfe kemanifo: “Akka, ¿afeskaxõ nõ ato pimatiromẽ? ¿Fanĩa nõ afaa fitiromẽ, nonokai tosa ikama?” faifono,

⁵ anã Jesús ato yõkani: “Akka, ¿afe tii mã pãayamẽ?” ato faito, “Siete pãakĩa,” fanifo.

⁶ Nãskakẽ Jesús, “Yõrafã rasi nãmã tsaokãfe,” ato fata, siete pãa tso mainĩfofã. Apa Nios aicho fata, pãa kaxke pakexõ aõxõ tãpimisfo inãni. Nãfãferi nã yorafo inãnifo pinõfo.

⁷ Nãskata foe ichapama ranãri ini. Nãskakẽ atoõxõ Jesús Apa Nios aicho fata, aõxõ tãpimisfo foe inãni a yorafori ato inãnõfo.

⁸ Nãskakẽ keyokõichi pikanax mãyakõinifo. A pikĩ chetefaafo siete fẽta fospikõia ini.

⁹ A piafo yorafo ichapakõi inifo, cuatro mil inifo. Nãskaxõ Jesús ato nĩchini fotanõfo.

¹⁰ Nãskata Jesús a aõxõ tãpimisfo fe kanõanãfã mẽra naneinãkafanax Dalmanuta mai ano kani.

Fariseofāfe, “Jesús, tsōa atiroma keskara noko ispafe nō mia chanĩmara fanō,” ixō yōkanifo
(Mt. 16.1-4; Lc. 12.54-56)

¹¹ Nāno fariseofo akiki fenifo afe yoināi fekani, feparaxō yōkapaikani. Iskafakī yoinifo: “Tsōa atiroma keskafakī afama mīshtifo fakī noko ispafe nō mia chanĩmara fanō mī Nios ariax oamāki,” faifono,

¹² Jesús fāsi xakainākafā ato yoini iskafakī: “¿Afeskakī na yorafāfe tsōa atiroma keskafakī noko ispafe ea fakanimē? Ē mato pāraima a Nios fistichi atiro keskara ě mato ispaima,” ixō ato yoini.

¹³ Ato askafata mā ato makinoax kai kanōanāfā mēra naneinākafā okiri ĩamāfā pokefaini kani.

“Fariseofo feta saduceofāfe anorima yoimisfoki ato nikayamakāfe,” Jesús ato fani
(Mt. 16.5-12)

¹⁴ Akka mā fōkakī, a pifofaifo shināmaki fainifo. Akka nā kanōanāfā mēra pāa fisti ini.

¹⁵ Askaifono Jesús ato yoini: “Ōisharakāfe. Fariseofāfe Herodes feta pāa faraxakafo piyamakāfe,” ato fani.

¹⁶ Ato askafaino, a aōxō tāpimisfo āa ranā yoinānifo iskakani: “¿Afeskakī noko iskafaimē? Nōkai pāa yama,” ikanax yoinānifo.

¹⁷ Nāskaifono mā tāpixō Jesús ato yoini iskafakī: “¿Afeskai nō pāayamara mā ikimē, mato ōiti mēraxō mā shināsharaimamē?”

¹⁸⁻¹⁹ Feroyafiaxō mā ōi sharaima, pachoyafiaxori mā nikasharaima. ¿Akka mā shināimamē? A cinco pāa cinco mil yorafo ě ato pimaita akka, ¿a chetefafo afe tii fēta fospia mā fiitamē?” ato faito kemanifo: “Doce fēta ikita,” fanifo.

20 “Askatari a siete pãa cuatro mil yorafo ã ato pimaita, akka, ¿afe tii fãta fospia mã fiitamẽ?” ato faito, “Siete ikita,” fanifo. “Askatari, ¿nã siete pãa ã kaxkeketsaxõ ã ato minita cuatro mil feronãfake, afe tii fãta texefafo mã fiitamẽ?” ato fani. “Sietekãa,” fanifo.

21 Askafaifono ato yoini iskafakĩ: “¿Ai mã tãpiamamẽ?” ato fani.

Jesús yora fẽxo Betsaida anoxõ sharafani

22 Nãskata mã Betsaida ano nokoafono, yora fẽxo Jesús ano iyonifo. Mã iyokaxõ iskafakĩ yoinifo: “Jesús, na feronãfake ramãfe,” faifono,

23 Jesús ãfe mẽkemã nã fẽxo mẽtsoinĩfofã pexe rasi pasoatai yoni. Nãrixõ ãfe kemõ ãfe fero mechanafayanã ãfe mẽkemã ramãni iskafakĩ yõkayanã: “¿Mã mã afara õitiromẽ?” faito,

24 nã fẽxo mã õisharaki iskafakĩ yoini: “Ë õi na feronãfakefo oa ififo kafanai keskara,” faito,

25 Jesús anã ãfe mẽkemã fero ramãkani. Nãskafaano nã fẽxo mã sharaxõ õisharakõini. Nãskaxõ keyokõi xafakĩakõi õisharakõini.

26 Nãskakẽ Jesús ãfe pexe ano nĩchini iskafakĩ yoiyanã: “Mĩ anã pexe rasi ano kakiki, mã pexekõi ano katãfe, mã tsoa yoikĩ,” fani.

“Mĩ Cristo mia Niospa ifini nokoki nĩchixii mã nõko xanĩfo finakõia inõ,” ixõ Pedro Jesús yoini (Mt. 16.13-20; Lc. 9.18-21)

27 Nãskafata Jesús a aõxõ tãpimisfo fe pexe rasi Cesarea Filipo pasoato fonifo. Fãi kakĩ Jesús ato yõkani: “¿Ea afaa yorafãfe faimẽ?” ato faito,

28 aõxõ tãpimisfãfe kemanifo iskafakakĩ: “Fetsafãfe Juan Maotistara, mia fakani. Fetsafãferi

Elíasra mia fakani. Fetsafãferi nã ato Niospa meka yoipaoni fetsa rakikĩa mia fakani,” ixõ yoinifo.

²⁹ “Akka, ¿mã ea tsoara faimẽ?” ato faito, Pedro kemani iskafakĩ: “Mĩ Cristo mia Niospa ifini nokoki nĩchixii mĩ nõko xanĩfo finakõia inõ,” faito,

³⁰ Jesús yoini iskafakĩ: “Eõnoa tsoa yoyamakãfe,” fani.

*“Chipo ea retexikani,” Jesús ato fani
(Mt. 16.21-28; Lc. 9.22-27)*

³¹ Nãskata Jesús ato yoikĩ taefani iskafakĩ: “Ë chipo omiskõi finakõixii. Askatari ea õikaspakakĩ ea potaxikani, judeofãfe ãto xanĩfofo feta a Nios ato kĩfixomis xanĩfofãfe a Moisés yoikĩ kirika keneni keskara ato tãpimamisfãfe. Askatari ea retexikani, akka ea retefiafono tres nia oxata ã anã otoxii,” ato fani.

³² Nãskakẽ xafakĩakõi ato yoini. Ato yoikĩ askafaito ori iyoxõ Pedro yoini iskafakĩ: “Ifo, askayamafe mia retekanima kiki,” faito,

³³ anã Jesús fesoakekafã aõxõ tãpimisfo õiyanã iskafakĩ Pedro yoini: “Emakinoax katãfe, Satanás. A Epa Niospa shinãi keskara mĩ tãpiamaki. Akka nã yorafãfe shinãifo keskara mĩ shinãikai,” fani.

³⁴ Nãskata Jesús aõxõ tãpimisfoya yorafo kenaxõ ato yoini iskafakĩ: “Fatora fetsa ãfe inakõi ipaikĩ ãakõi apaiyai keskara anã atiroma. Nã ã yoiyai keskara nikakõitiro. ‘Ëfe Ifoxõ ea retefiaifono ãkai ãfe Ifo ã potapakenakama,’ ixõ shinãitiro.

³⁵ Akka fẽtsa ãa shinãitiro iskakĩ: ‘Ë Nios Ifofaito ea retetirofo. Nãskakẽ ã Nios Ifofaima,’ ixõ shinãitiro mesekĩ. Askara yora naax ãfe Epa ano katiroma. Akka nã ea Ifofaa, ãfe meka yoiaito

askayamākī eōxō reteafono ẽ ifixii efe ĩpaxanō eamāi Ifofamiskē.

³⁶ Akka fatora fetsa afara ichapayakōi ikatsaxakī, anā āfenā itiroma. Mā naax omiskōipakenaka.

³⁷ Akka, ħnĭpaxakī yorafāfe afe tii kopifatirofomē? Maa, afaa kopifatirofoma.

³⁸ Akka fatora fetsa eō rāfikī, ẽfe meka sharari yoikaspai yora chakafāfe ferotaifi ẽri aō rāfikī yoikī iskafaxii: ‘Ë na yora õimisma,’ ẽ faxii ẽfe Ëpa sharafoya fotoxō, ẽfe ājiri sharafori efe fotopakefofāxikani,” ixō ato yoini.

9

¹ Askatari anā Jesús ato yoini iskafakī: “Ë mato pāraima, fatora fētsa nono efe iyoxō nayoxoma ẽfe Epa xanĭfo finakōia õiyoxikani āfe sharaõnoax oaito,” ixō ato yoini.

Jesús āfe femānā fetsa keskara ini, fafekōini. Āfe rapatiri oxokōi ini

(Mt. 17.1-13; Lc. 9.28-36)

² Nāskata mā seis nia finōta, Jesús māchi keyakōi ari māpekī āfe ina tiis ato iyoni. Pedro iyota, Santiago iyota, Juan iyota ato fani. Nāriax āto ferotaifi Jesús fetsa keskara ini.

³ Āfe rapati fafekōini oxo finakōia ini, mā pat-sasharafikakī tsōa askafatiroma ini.

⁴ Nānoa Elías yafi Moisés õinifo Jesús fe mekaifono.

⁵ Nāskaifono Pedro Jesús yoini iskafakī: “Ifo, sharakōi ano nō oa. Nono nō tres tapas fanō, fetsa mia axota, fetsa Moisés axota, fetsa Elías axota, nō fanō,” fani.

⁶ Akka aõxõ tãpimisfo ratekõinifo. Nãskakẽ Pedro tãpinima a yoiai keskara, shinãyamaino yoini.

⁷ Nãskaifono kõiñi ato maipakefofãni. Nã kõi mẽranoax mekai iskaito nikanifo: “Nafi ẽfe Fakekõiki ẽ aõ noikõi. Nãskakẽ nikasharakõikãfe,” ikaito nikanifo.

⁸ Askaito nikafikakĩ, a kemataima õiafo ano ato fe tsoa inima, Jesús fisti ares ato fe ini.

⁹ Nãskata mã mãchi keya ariax fotoxõ, “A mã õia keskara mã tsoa yoiki. Ẽ naax mẽ anã otoano mã ato yoitiro,” ixõ ato yoini.

¹⁰ Nãskakẽ tsoa yoitama. Ares fisti ãto õiti mẽraxõ shinãnifo mã tãpifikaxõ. Naax ẽ anã otoxira noko-faito nõ tãpiama ikanax yoinãnifo.

¹¹ Nãskaxõ Jesús yõkanifo, iskafakakĩ: “¿Afeskakĩ a Moisés yoikĩ kirika keneni keskara ato tãpimamisfãfe iskafakĩ yoimismomẽ Elías rekẽ oi taexii?” ixõ yoimismomẽ faifono,

¹² ato kemakĩ iskafani: “Chanĩma, Elías rekẽ fotoi taexii, nãato ato yoisharaxii itipinĩsharanõfo. Akka, ¿afeskakĩ kirika ano kenenifomẽ, a ẽ omiskõixiai yorafãfe ea chakafakakĩ ea potaifono?”

¹³ Akka ẽ mato yoinõ mã Elías ifana. Nãskakẽ nã apaiyai keskafakakĩ chakafanifo. Nãnori aõnoa yoikĩ kirika kenenifo,” ixõ ato yoini.

*Jesús feronãfake naetapa niafaka chaka põtaxoni
(Mt. 17.14-21; Lc. 9.37-43)*

¹⁴ Nãskata mã Jesús fe fõtatakĩ a Jesúsxõ tãpimis fetsafo ano nokokaxõ õitoshinifo yõrafã rasifo fe a Moisés yoikĩ kirika keneni keskara ato tãpimamisfo fe ato fe feratenãifãfe.

15 Nāskaifono Jesús oaito fichikanax akiki keyokōi farekefaikaxō, “Kee, mā Jesús oi kiki,” ikaxō yoisharanifo.

16 Askaifono Jesús ato yōkani iskafakī: “¿Afeskai mā ato fe feratenāimē?” ato faino, fētsa kemani iskafakī:

17 “Maestro, ēfe fake ē mikiki efea, niafaka chaka a mēra nanexō mekamamismano.

18 Nā kapaiyai arixō, niafaka chakata achi-ano paketiani. Āfe axfapa fākox keyopaketiani, askatari āfe piti yeyexamis, askatari charishi fetsemis. Mē mī inafō yoia a makinoa niafaka yōshi chaka pōtanōfo. Akka mī inafāfe atirofoma,” faino,

19 Jesús kemani: “Mākai ea chanīmara faima. Mā afara shināmis. Akka afetīakai ē nono mato fe itianima. ¿Afetīakai mā ea nikaimē? Niri nā fake efekāfe,” faino,

20 nāskakē Jesús ano nā fake iyonifo. Akka nā nīafaka mā Jesús tāpīxō, nā feronāfake anā choamanaino anā nāmā pakeni. Nāskakē tarame tarame iyanā āfe axfapa fākox keyopakeni.

21 Nāskaxō Jesús apa yōkani iskafakī: “¿Afetīa fichinimē?” iskaifaito, apa yoini iskafakī: “Afetīa fichinima. Yomeax fichini.

22 Mēxotaima na niafaka chakata iskafaino, chiinaki paketa fakanaki pakemis, retepaikī iskafaino. Nāskakē mī sharafatiromakī sharafafe, noko shinākī ēfe fake ea sharafaxōfe,” faino,

23 Jesús yoini: “¿Afeskakī ēfe fake mīa ea sharafaxotiromamē mī ea faimē? Ea chanīmara faifono ē ato afama mīshti faxotiro,” fani.

24 Nāskakē nā fake āpa fāsikōi mekani iskafakī yoini: “Ē mīa chanīmara fai, ea axōfe ē mia chanīmara fakī finakōinō,” ixō yoiaino,

²⁵ yōrafã rasi ichanãfono Jesús òini, Jesús feronãfake makinoa niafaka potaito òipaikani. Nãskakē Jesús niafaka iskafakī yoini: “Niafaka yōshi chakata, na fake mī mekamatama, mī nikamamismaki, ē mia yoikai na fake makinoax tsekekaitãfe, nãskax mī anã a mēra ikiki,” faino,

²⁶ niafaka yōshi chaka fãsikōi fiisini. Nãskakī nã fake anã choamani. Nãskata mã fake makinoax tsekekaikī oa naa keskara fafãini. Nãskakē iskafakī yoinifo: “Mã naa raka,” faifono,

²⁷ akka Jesús ãfe mēkemã mētsota fininĩfofanaino nã feronãfake niinãkafãni.

²⁸ Nãskafata Jesús pexe mēra ikikainano, anoxō a aōxō tãpimisfãfe a fisti yōkanifo: “Akka, ¿afeskakīri nō niafaka yōshi chaka potatiromamē?” ixō yōkaifono,

²⁹ Jesús ato kemani: “Na keskara niafaka mã potakī Epa Nios kīfita foni teneyanã Nios shinãkī mã potatiro. Akka mã askayamaxō mã potatiroma,” ato fani.

*Anã Jesús ato yoini: “Chipo ea retexikani,” ixō
(Mt. 17.22-23; Lc. 9.43-45)*

³⁰⁻³¹ Nãskata Jesús nãnoax a aōxō tãpimisfo fe kakī Galilea finōfaini. Akka Jesús ato tãpimakaspani, “Ea tãpiyamanōfora,” ixō. A aōxō tãpimisfoosmãi ato tãpimakī iskafakī ato yoini: “Ea achikaxō ãto xanĩfofo ano ea iyoxikani, afãfe ea retenōfo. Akka ea retefiafone tres nia oxata ē anã otoxii,” ato faito,

³² tsōa tãpinima a ato yoiai keskara. Yōkapai akiki ranonifo.

*“Akka, ¿tsoakaimē sharafinakōia?” inifo
(Mt. 18.1-5; Lc. 9.46-48)*

³³ Nāskata pexe rasi Capernaúm ano nokonifo. Nā pexe anoxō Jesús ato yōkani: “¿Afeskai fai anoax mā feratenāmē?” ato faino,

³⁴ tsoa tooxinima, akka fai nēxpakīanoax feratenāi iskakanax: “¿Tsoakai sharafinakōiamē?” ikanax.

³⁵ Nāskakē Jesús tsoaxō a aōxō tāpimisfo doce kenaxō ato yoini: “Fatora fētsa ato finōpai nā yorafāfe āto ina keskara itiro, nāskakē keyokōi ato axosharakōitiro,” ixō ato yoini.

³⁶ Nāskata ato nēxpakīa fake yome nīchita, chish-toinīfōfā ato yoini:

³⁷ “Akka fatora fētsa ēfe aneōxō na fake yome noikī nāatori ea noisharakōi. Nā ea noisharaito ea fisti noima, nā ea nīchiniri noisharai,” ixō Jesús ato yoini.

*Fētsa noko noikaspatama noko sharafai
(Mt. 10.42; Lc. 9.49-50)*

³⁸ Ato askafaito Juan yoini: “Maestro, mā nō ōia oa feronāfake fistichi mī aneōxō niafaka chaka potaito. Nāskakē mī nofe rafemismaki, askafayamafe mī yorafo makinoa niafaka potatiromaki nō faa,” faito,

³⁹ Jesús kemani iskafakī: “Askafayamakāfe. Akka nā ēfe aneōxō afama mīshtifo faxō chipo ea chakafakī mekafatiroma.

⁴⁰ A noko chakafakī mekafaima, nofe rafe-sharai.

⁴¹ Akka fētsa mato shinākī, nato Cristo Ifofaki ixō mato faka ayamanaito, askara Niospa afara ināsharatiro. Chanīmakōi ē mato yoi,” ixō ato yoini.

Noko fĕtsa afara chakafamaino āfenā mesekōi itiro

(Mt. 18.6-9; Lc. 17.1-2)

⁴² Anā Jesús ato yoini iskafakī: “Na fakefāfe ea chanīmara faifono, fatorafāfe ato afara chakafamaifono, tokirinīfaya tenextifaxō fakafā nōafā mēra mā ato potatiro ato anā afaa chakafamanōfoma.

⁴³⁻⁴⁴ Akka māto mēkemā mato afara chakafamaino mextemekāfe. Akka mā mā mextemeax Epa Nios ari mā katiro afe nīpaxakī. Akka mifi rafeyaxō mā afara chakafaax chiifā xoisai mēranoax mā omiskōipakenaka, a chiifā nokanakama anoax. Anoax xenafo nayamaino, chiiri nokanakama anoax.

⁴⁵⁻⁴⁶ Askatari mī tāe mia afara chakafamaino oxtemefe. Akka mā mī oxtemeax Epa Nios ari mī katiro afe īpaxakī. Akka mī oxtemeamax tae rafeyax chiifā mēranoax mī omiskōipakenaka, anoax xenafo nayamaino, chiiri nokanakama anoax.

⁴⁷ Askatari mī fēro mia afara chakafamakē tsekafe. Nāskax mī fero fistiax Epa Nios xanīfo ano mī katiroki. Akka mī fero rafeyax chiifā mēranoax mī omiskōipakenaka.

⁴⁸ Anoax xenafo nayamaino chiiri nokanakama anoax.

⁴⁹ “Nāskakē chiifā mēranoax keyokōi omiskōipakenakafo.

⁵⁰ Akka tashi shara. Akka mā nami tashiya ayamaxō, afeska faxō mā anā sharafatiromē, mā anā sharafatiroma, chakanatiro. Nāskakē oa tashi keskara ikāfe isharakōiax. Fetsafo ato yoisharaxikakī anā afaa chakafanōfoma.”

10

*Feronãfake ãfe ãfi fe enenãtirofoõnoa Jesús ato yoini
(Mt. 19.1-12; Lc. 16.18)*

¹ Nãskata Jesús Capernaúm anoax tsekekainax Judea mai ano kani. Nã Jordán faka ketokonõ, nãnoxõ anã yorafo ichanãfaxõ anã ato yoini, ato yoimis keskafakĩ.

² Ato yoikĩ askafaino fariseofo Jesús ano fenifo. Akiki fẽkaxõ chakafakĩ mekamapaikani. Nãskaxõ yõkanifo iskafakĩ: “Nõko xinifãfe Niospa meka yoikĩ kenenifo keskafakĩ, ¿feronãfake ãfe ãfi enepaikĩ enetiromẽ?” ixõ yõkaifono,

³ Jesús ato kemani: “Moisés mato kirika kenexokĩ, ¿fanĩri mato yoinimẽ?” ato faito, iskafakĩ yoinifo:

⁴ “Moisés kenekĩ iskafani: ‘Fẽtsa ãfe ãfi enepaikĩ taefakĩ kirika kenexotiro iskafakĩ: “Ë mia anã fiima, mĩ anã ãfe ãfi ikima,” ’ ixõ mã yoitiro noko fani,” ixõ yoiiaifono,

⁵ Jesús ato kemani iskafakĩ: “Moisés iskafakĩ mato yoini: ‘Mãkai afaa tâpiama mãto õiti kerexkõi,’ ixõ mato yoini.

⁶ Akka taekõifakĩ, Niospa feronãfake yafi kẽro onifani.

⁷⁻⁸ Nãskakẽ feronãfake mã ãfiyax ãfe apa yafi ãfe afa makinoax paxkatiro ãfi fe fianãxiki. Nãskakẽ ãfe ãfi fe yora fisti keskara itirofo. Nãskakẽ anã yora rafema, yora fisti keskara ikani ãfe ãfi fe.

⁹ Nãskakẽ feronãfake ãfe ãfi enetiroma Niospamãi ato fianãmano,” ixõ ato yoita,

¹⁰ mā pexe mēra ikiano, anā a aōxō tāpimisfāfe yōkanifo: “A mī yorafo rama yoiai keskara nokori yoife,” faifono,

¹¹ Jesús ato yoini iskafakī: “Akka fētsa āfe āfi enexō kēro fetsa fixō afe ikī a fikī taefani chakafai.

¹² Askatari feronāfake āfe āfi enexō fetsa fixō fetsa fe ikī āfe āfi chakafai,” ixō Jesús ato yoini.

Jesús fakefo chishtoxō ato māmāyanā ato Epa Nios kīfixopakeni

(Mt. 19.13-15; Lc. 18.15-17)

¹³ Askatari yorafāfe āto fakefo Jesúski efenifo ato māmāpakeyanā ato Epa Nios kīfixonō. Akka a Jesúsxō tāpimisfāfe ato iskafanifo: “Māto fakefo efexō nōko Ifo fekaxtefayamakāfe,” ato faifono,

¹⁴ nikakī Jesús ato iskafani: “Ato enekāfe na fakefo ekeki fenōfo, ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini.

¹⁵ “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios xanīfo ika ari mā katiroma,” ixō ato yoita,

¹⁶ fakefo chishtoinīfofā ato māmāpakeyanā: “Epa Niospa, na fakefo sharafafe,” fani.

Feronāfake naetapa kori ichapayax Jesús fe mekani

(Mt. 19.16-30; Lc. 18.18-30)

¹⁷ Mā askafata mā Jesús kaino feronāfake fetsa ichoax akiki nokoni. Mā akiki nokoxō ratokonō mai chachipakefofā yōkani iskafakī: “Maestro mī sharaki, ea yoife ē afaa afeskatiromakī Nios xanīfo fe ipaxakī,” ixō yōkaito,

18 Jesús kemani: “¿Afeskakĩ sharara mĩ ea faimẽ? Akka Nios fisti shara.

19 Niospa shinãmanaino a Moisés yoini keskara mã mĩ tãpia. Iskafakĩ yoini: ‘Ato reteyamakãfe, askatari mãto ãfima chotayamakãfe, askatari kēromãri mãto fenema chotamayamakãfe, askatari atoki yometsoyamakãfe, askatari chanĩ yoyyamakãfe, askatari mã kaxpa ato pãrayamakãfe, askatari mãto epa yafi mãto efa nikasharakõikãfe,’ ” ixõ Jesús yoini.

20 Askafaito nã feronãfake kemani iskafakĩ: “Maestro, nã mĩa yoiai keskara mē nikamis yomexõ,” faito,

21 nikakĩ Jesús õiyanã aõ noiyanã iskafakĩ kemani: “Nãno afara fisti mĩ tãpiama. Kaxõ mĩ afarafo minixõ kori fixõ nã afaamaisfo ato inãketsatãfe. Nãskakē nai mēranoax afama mĩshtifoya mĩ ixikai. Mã mĩ kori ato inãketsata anã oxõ ea Ifofasharafe,” ixõ yoini.

22 Askafaito nikai nã feronãfake shinãchakakõi tooxinima kori ichapayamãiyaxõ ato inãkaspai. Nãskax Jesús makinoax kani.

23 Nãskaito Jesús aa kemataima õiakexõ, aõxõ tãpimisfo yoini iskafakĩ: “A yora afama mĩshti ichapaya Nios xanĩfo ano katiroma, fekax pishta,” ixõ ato yoiaito,

24 nikakakĩ ãfe inafãfe: “Kee, ãfe meka nõ tãpitiroma,” ixõ tãpipainifo. Askaifono anã Jesús ato yoini iskafakĩ: “Èfe fakefãfe, fekax pishta afama mĩshtifoya ikatsaxakĩ mã Nios Ifofapaia.

25 Māraki camello akoja kini mēra ikipaifi ikitiro, fekaxkõi efapamãiax. Nãskarari yora afama mĩshti

ichapayato Nios Ifofapai, fekaxkõi ãfe afama mĩshtifomãipotakaspakĩ,” ixõ Jesús ato yoini.

²⁶ Ato askafaito nikakakĩ a aõxõ tãpimisfãfe tãpipainifo. “¡Kee! ¿Afeskax nõ Nios fe ipaxatiromẽ?” ikanax yoinãnifo.

²⁷ Askaiãfãfe õikĩ Jesús ato yoini: “Yorafokai ãa ifimetirofoma. Nios fistichi yorafo ifitiro. Niospa afama mĩshtifo fatiro, yorafãfe atiroma keskara,” ixõ ato yoini.

²⁸ Ato askafaito nikakĩ Pedro yoini: “Ifo, nõ mefe okĩ nõko afama mĩshtifo nõ õiferani nõ mefe oni,” faito,

²⁹ Jesús kemani iskafakĩ: “Ë mato paraima, fẽtsa eõxõ ãfe meka sharaõnoa ato yoikakĩ ãfe pexe õifaini, ãfe onefetsafori õifaini, ãfe poifori õifaini, ãfe apari õifaini, ãfe afari õifaini, ãfe fakefori õifaini, ãfe tareri õifaini,

³⁰ nãato niyoxõ afama mĩshtifo fitiro, Niospa inãino, pexefoya ita, onefetsafoya ita, poifoya ita, afafoya ita, fakefoya ita, tarefoya ita itiro. Nãfo Niospa inãsharafiano omiskõixii. Nãskafiax chipo Epa Nios fe ipanaka.

³¹ Akka iskaratĩa yora ichapafãfe ato finõpaikani, nõ finakõiara ikaxõ, akka chipo fenotirofo. Akka a ato finõpaiyamaifo iskaratĩa Niospa ato finakõia imaino Nios fe ipanakafo,” ixõ ato yoini.

*Anã Jesús ato yoini: “Mã chaima ea retekanira,”
ixõ
(Mt. 20.17-19; Lc. 18.31-34)*

³² Askafakĩ ato yoita Jerusalén ari kani. Jesús rekẽ kaino aõxõ tãpimisfo acho fonifo. “Kee, ¿afeskai nõko Ifo Jerusalén ano kaimẽ?” ikanax

ratekōinifo. Nāskaifono a aōxō tāpimisfo tii ato kenaxō Jesús ato yoini iskafakī: “Iskaratīa afaa afeskaimākai ē mato yoinō.

³³ Mā mā ōikai, iskaratīa Jerusalén ano nō māpei kaikai. Nānoxō ea achikaxō a ato Nios kīfixomis xanīfofo yafi a Moisés yoikī kirika keneni keskara ato tāpimamisfo ea ato inākani kiki. Anoxō ea iskafakani: ‘Na Jesús ato chakafamiskī retekāfe,’ ixō ea yoikāta, yora fetsafo ano ea iyokani afāfe ea retenōfo.

³⁴ Nāfāfe ea kaxemetsama fayanā, ekeki kemo mechoketsayanā ea koshaketsakata ea retেকani. Akka ea askafafiafono tres nia oxata ē otoxii,” ixō ato yoini.

Santiago feta Juan Jesús yōkanifo afe xanīfo ipaikakī
(Mt. 20.20-28)

³⁵ Santiago fe Juan, Zebedeo fake rafe ini. Nā rafeta Jesús ano fōkaxō iskafakī yoinifo: “Maestro, na nō mia yoiāi keskafakī noko axōfe, nō mia yōkaikai,” faifono,

³⁶ ato yōkani: “¿Ē mato afaa afeska faxotiomē?” ato faito,

³⁷ anā yoinifo iskafakakī: “Mī xanīfokōikī nokori xanīfo imafe, nō mefe xanīfo inō. Takai fetsa ē tsaofaino, takai fetsari ēfe ochi tsaonō,” faifono,

³⁸ Jesús ato yoini iskafakī: “Na mā ea yōkai keskara mā tāpiama. ¿Na ē omiskōiai keskai māri mā omiskōitiromē?” ato faino,

³⁹ kemanifo iskafakakī: “Ēje, nōri nō tenetiro,” faifono, Jesús ato yoini iskafakī: “Chanīma, nā ē teneai keskafakīri, mā tenetiro omiskōifinakōifikī.

⁴⁰ Akka efe ketaxamei tsaopai tsoa efe ketaxamei tsaotiroma. Ĕfe Epa Nios fistichi tãpia. Nã Epa Niospa katoafo ano efe tsaotirofo,” ixõ ato kemani.

⁴¹ Askafaifãfe nikakani a aõxõ tãpimisfo diez atoki õitifishkinifo, Santiago yafi Juan mepaikani.

⁴² Askaifono akka Jesús ato kenaxõ ato yoini iskafakĩ: “Mã mã tãpia, yora fetsafo xanĩfokaxõ fãsikõi mekayanã ato yonomamisfo. A xanĩfo fe rafeafãferi ato yoimisfo iskafakakĩ: ‘Nõri mato xanĩfo. Nõ mato yoiaito mã noko afara axorisafatiro,’ ixõ fãsikõi ato yoimisfo.

⁴³⁻⁴⁴ Akka mã ranã askayamakãfe. Askatamaroko fatora fetsa mã xanĩfo ipai, ato yonoxomis keskara mã itiro.

⁴⁵ Akka ěri anori shinãima, ěfe Epa Nios ariax ě nãmã ftoni feronãfakekõi ixiki, ě Niospa Fakefekẽ ea afara axonõfo ě onima. Askatamaroko fetsafo ě ato afara sharafaxoxiki ě oni. Ĕ atoõnoax naxiki ě oni. Satanás chaka ãto ifo inõma ě oni,” ixõ Jesús ato yoini.

Jesús Bartimeo fẽxokẽ sharafani

(Mt. 20.29-34; Lc. 18.35-43)

⁴⁶ Nãskata Jericó pexe rasi ano nokonifo. Nãnoax mã Jesús tsekekainaino, aõxõ tãpimisfo fe yõrafã rasi afe fonifo. Fokãkĩ yora fẽxo fai ketokonõ tsoa fichinifo, ãfe ane Bartimeo, Timeo fake ini. Nãno fai ketokonõ tsoaxõ ato kori yõkatiani ini.

⁴⁷ Nãno fai ketokonõ tsoaxõ nã fẽxo nikani Jesús Nazarete anoa kafani faifãfe. Nãskafaifãfe nikai nã fẽxo fãsikõi fiisini, iskafakĩ yoini: “¡Jesús mĩfi David fenaki, ea shinãfe!” fani.

48 Askafaito, “Nōko Ifo fekaxtefayamafe,” fanifo. Askafafiaifono fāsikōi fiisini, iskani: “¡David fenapa, ea shināfe!” faito nikai.

49 Nāskakē Jesús nēteakekafā ato yoini iskafakī: “Ea kenaxokāfe,” ato faino, kenanifo iskafakī yoiyanā: “Inimayanā fininākafāfe, Jesús mia kenakī,” ixō yoiiaifono,

50 nikakī āfe tari rashkita potata koshikōi nininākafā ichotiri ichotiri ita Jesús ano oni.

51 Mā akiki oano Jesús yōkani: “¿Ē mia afeska fanō ea mā yōkamē?” faito, nā fēxo kemani: “Maestro, ēfe fero ē sharafapai,” faino,

52 Jesús yoini iskafakī: “Mā mī katiro, ea chanīmara faax, mā mī sharaki,” fani. Naskafaino nā fēxo ōisharakōitani. Mā sharaxō Jesús fāi kaino chīfafaini.

11

Jesús nokoni Jerusalén ano

(Mt. 21.1-11; Lc. 19.28-40; Jn. 12.12-19)

¹ Nāskata Jesús fe fokakī Jerusalén chaima fonifo. Nāno pexe rasi Betfagé fe Betania chaima ini, machi Olivos ano. Nānoxō Jesús a aōxō tāpimis rafe nīchini.

² Ato iskafakī yoiyanā: “Mēstekōi fotakāfe oa ono pexe rasi ano. Nāno mā nokoxō mā fichi kaikai burro fake nexekē toa aō nimisma. Tēpexō ea efexotakāfe.

³ Anoxō mato yōkaifono iskafakaki: ‘¿Afeskakī mā burro tēpeimē?’ mato faifono, iskafakī ato yoikāfe: ‘Nōko Ifāfe fichipaiyaito nō ifixoniyoa, samama mato nīchixoni kiki,’ ixō ato yoikāfe,” Jesús a aōxō tāpimis rafe fani.

4 Askata mā fōkaxō fichitoshinifo burro pexe fepoti ano nexekē emāiti fainaki fichixō tēpexō efenifo.

5 Nā ano ikafāfe ato iskafanifo: “¿Afaa mā afeskafaimē? ¿Afeskakī mā burro tēpeimē?” ato faifono,

6 nā Jesús ato yoia keskafakī ato kemanifo: “Ia. Iyoxotakāfe,” ato fanifo.

7 Nāskata Jesús ano burro efekāta, āfe kate kamaki āto rapati kakafanifo. Nāskafafono a kamaki Jesús tsaoinākfāni.

8 Akka mā Jesús kaino yorafāfe āto rapatifoya epe peifo xatekaxō kakafaxō fonifo akiki ini-makakī.

9 Akka nā rekē foaifāfe a acho foaifo fāsikōi tai taifonifo. Iskafa fonifo: “¿Aicho, nā sharafinakōia nokoki oi kiki, nōko Ifo Niospa nokoki nīchiano!

10 Nōko xini David xanīfo ipaoni keskai, mīri nōko xanīfo ixiki oa. ¿Aicho! ¿Nios sharakōi!” ixō yoinifo.

11 Nāskata Jesús mā Jerusalén ano nokoax, Nios kīfiti pexefā mēra ikixō, a mēranoafo ōifofāsafani. Nāskata nānoax tsekekaini kaax a aōxō tāpimisfo docefo fe Betania ano kani, mā yātapakeaino.

“Fana higuera, mī anā fiminakama,” Jesús fani (Mt. 21.18-19)

12 Pena fetsa mā Betania anoax okī Jesús mea fonāikōi fini.

13 Nāskakē chai ixō fana higo nikē ōini, peifoya ini. Kaxō ōini fimiyaamakī, akka kaxō ōia fimiya inima āfe peifos ini. Nā fimiyamaitīa ōini.

14 Nāskakē Jesús fana higo yoikī iskafani: “Anā tsōa mī fimi pinakama,” faito, āfe inafāfe nikanifo.

Jesús a Nios kīfiti pexefã mēraxõ a ato inãifo ato potani

(Mt. 21.12-17; Lc. 19.45-48; Jn. 2.13-22)

¹⁵⁻¹⁶ Nāskata anã Jerusalén ano nokonifo. Nānoax Jesús anã Nios kīfiti pexefã mēra ikitoshini. Ikitoshixõ õia a mēraxõ afarafo ato miniaifono xafakīa ato kāmiani, a ato fīaifori askafani xafakīa kāmikī. A ato kori inãifo anoari mīsafo ato pōtaketsani, askatari a ato rifi miniaifo anoari āto tsaotifori ato pōtaketsani. “Nã Nios kīfiti pexefã mēraxõ tsõa afaa ato inãtiroma,” ixõ fāsi mekainākfā ato yoini.

¹⁷ Ato tāpimakī iskafakī ato yoini: “Niospa meka yoikī iskafakī kirikaki kenenifo: ‘Na ěfe pexefã anoxõ keyokõichi nã maitio ano ikafāfe ea kīfitirofo,’ ixõ kenefinifono, akka nã yometsofāfe pexe keskara mā famis,” ixõ ato yoini.

¹⁸ Ato askafaito, a ato Nios kīfixomis xanīfofo feta, a Moisés yoikī kirika keneni keskara ato tāpimamisfāfe nikanifo. Nāskakē afeskaxoma Jesús retepainifo, retepaifikani mesenifo, yorafāfemāi nikakõiaifono a yoiāi keskara, “Aira, na keskara meka nō nikamisma, āfe meka sharakõi,” ikaxõ.

¹⁹ Akka mā fakishaino Jesús a aõxõ tāpimisfo fe Jerusalén anoax anã kani.

Fana higuera xanani

(Mt. 21.20-22)

²⁰ Askano anã pena fetsa finõfāikakī õinifo, nã fana higuera mā xanano āfe tapofoya.

²¹ Nāskakē Pedro shinākī Jesús yoini iskafakī: “Maestro, õipo na higuera mī kamafofāita mā xana,” faito,

²² Jesús kemakī iskafakī: “Nios nikakōikāfe,” ato fani.

²³ “Akka ã mato pāraima. Māto õiti mēraxõ mã Nios nikakōixõ na mãchifã mã yoikī iskafatiro: ‘Nonoax tsekekainax fakafã mēra paketāfe,’ mã faino fakafã mēra paketiro. Nã mã yoiai keskai nãskakõitiro.

²⁴ Nãskakē ã mato yoi, afara mã fichipaikī mã Epa Nios chanĩmara faxõ mã kīfiato mato inãtiro, mãtonã inõ.

²⁵ Akka mã Epa Nios kīfikī, fetsaki mã õitifishki iyoxõ ãkisi raefayokāfe, Epa Nios nai mēranoato mãto chaka mato soaxonõ.

²⁶ Akka mã fetsafo raefayamaito, matori Epa Niospa nai mēraxõ mãto chakafo mato soaxotiroma,” Jesús ato fani.

“¿Tsõa mia nĩchinimē mĩ xanĩfo inõ?” ixõ Jesús yõkanifo anoxõ achipaikakī

(Mt. 21.23-27; Lc. 20.1-8)

²⁷ Nãskata Jerusalén ano anã fenifo. Nãnoax Nios kīfiti pexefã mēra Jesús kafāsaino, nãno akiki fenifo. A ato Nios kīfixomisfãfe ãto xanĩfofo fe, a Moisés yoikī kirika keneni keskara ato tãpimamisfo, judeofãfe ãto xanĩfofori fenifo.

²⁸ Anoxõ yõkanifo iskafakakī: “¿Tsõaõxõ mĩ iskafaimē, tsõa mia yoiamē mĩ iskafanõ?” ixõ yõkaifono,

²⁹⁻³⁰ Jesús ato kemani iskafakī: “Ëri mato yõkanõ ea yoikapo ã nikanõ. Ea mã yoiaito ã mato yoikai tsõaõxõ ã iskafaimākai. Akka, ¿tsõa Juan nĩchinimē ato maotisafakī ato faka mēra ikimapak-enõ? Niospa nĩchiyamakī yorafãfe nĩchiniforaka ea yoikapo,”

³¹ ato faino ãa ranã mēenãpaiyanã iskanifo: “Nõ kemakĩ iskafaino: ‘Niospa nĩchini,’ nõ faino noko yoikĩ iskafai: ‘Akka, ¿afeskakĩ mã Juan nikamis-mamē?’

³² Akka nõ iskafakĩ yoitiroma: ‘Yorafãfe Juan nĩchinifo,’ ixõ nõ yoitiroma, yorafoki nõ mesei nokoki õitifishki itirofo.” Akka yorafãfe keyokõichi tãpiafo Niospa shinãmanaino Juan ato yoipaoni.

³³ Nãskakē yoikĩ iskafanifo: “Nõ tãpiama tsõara Juan nĩchini,” faifono, Jesúsri ato yoikĩ iskafani: “Ëri mato yoitiroma tsõaõxõ ã iskafaimãkai,” ixõ ato yoini.

12

Meka fetsafaxõ Jesús ato yoini a ato yonoxomis chakafoõnoa

(Mt. 21.33-46; Lc. 20.9-19)

¹ Anã Jesús ato yoini meka fetsafaxõ iskafakĩ: “Feronãfake fẽtsa ãfe tare ano uva fanani. Fanaxõ akiki keneakeni. Akiki keneakexõ mai põkini a mēraxõ uva tsinĩxiki. Askatari pexe keya fani anoxõ kexexiki tsõa mēeyamanõ. Mã askafakĩ fet-saxõ a ano yonofaifo ato inãyoni. Nãskafata mai fetsa ari kayoni.

² Nã fimimistĩa mã ãfe fana pachianõ, ãfe ifãfe a yonoxomis nĩchini, a kexexonafo ato yõkaxõ ãfe fana fimifo fixotanõ nõ ãfenã tiiri.

³ Akka ãfe kaifo fichikaxõ nõ fana kexeafãfe achikaxõ seteketsakaxõ, afaa inãkaxoma afaa-maiskõi nĩchinifo.

⁴ Nãskata nõ tare ifãfe anã a yonoxomis fetsa nĩchini. Akka nãri ïchaketsayanã tokirinĩ mapoki tsakakĩ imi tofeketsafono oni.

⁵ Nāskano afianā fetsari nīchiano nāa retenifo. Mā reteafono ranāfaxō ato nīchini, nāfori ato seteketsayanā, ranāri ato retenifo.

⁶ “Mā ato askafafono, nāno āfe fake fisti ini, nā aō noikōiai. Nāskakē chipokōi fakī āfe fake nīchini: ‘Ēfe fake nikatirofokī,’ ixō.

⁷ Akka mā āfe fake nīchia kaito fichikanax nā tare kexemisfo yoinānifo iskakani: ‘Nato āfe apa naano na fanafo fixii kiki, a nari nō retenō na tare nōkonā inō,’” ikanax yoinānifo.

⁸ Nāskakē achikaxō mā retetakxō tare pasotai potanifo.

⁹ Nāskakē Jesús ato yōkani: “Akka, ¿a tare ifāfe ato afeska fatiromē? Kaxō a tare kexemisfo ato reteskī mitoxō fetsafo āfe tare inātiro afāfe kexexonōfo,” ixō Jesús ato yoini.

¹⁰⁻¹¹ “Akka, ¿a kirika kenekī iskafanifo mā anemismamē?:

Tokiri pexe fapaikakī nā pexe famisfāfe na tokiri chakara ixō potafono, fetsafāfe fichixō na tokiri sharakōi ikaxō akiki pexe fatirofo. Nāskarifiakī xanīfofofāfe, ‘Nakai afama,’ ikaxō Niospa Fake ōikaspamisfo. Askafafiaifono Niospa āfe Fake katoni nōko Ifo inō. Nāskakē nō akiki inimakōi, ixō kirika ano kenenifo,” Jesús ato fani.

¹² Nāskakē Jesús achikaxō karaxa mēra ikimapainifo, mā tāpikaxō meka fetsafaxō atoōnoa yoiaito. Akka achipafikani yorafoki mesekani a makinoax fonifo.

“¿Xanīfo nō kori inātiro mē noko yōkaito?” ixō Jesús yōkanifo

(Mt. 22.15-22; Lc. 20.20-26)

13 Nāskakē chipo fariseofāfe Herodes feta afe yorafo Jesús ano nīchinifo, fanīrira Jesús ato yoiaito afāfe yōanōfo āto xanīfofo yoikakī.

14 Nāskakē mā akiki fēkaxō nāfāfe yōkanifo iskafakakī: “Maestro, mā nō tāpia a mī yoiai anori chanīmakōi mī yoimis. Epa Niospa noko shināmapaiyai anorikōi mēstekōi mī noko yoimis. Afara yoipai mī ranomisma, afarikai mī fomāmisma, na yorafāfe yoiaifo anori mī nikatama, a shināifo anori mī shināmisma. Askatamaroko Epa Niospa meka shara mēstekōi mī yoimis. Akka chanīmamakī noko yoife na romanō xanīfo nō kopifatiromakī askayamakī nō kopifatiroma rakikīa,” ixō yōkaifono,

15 Jesús tāpini feparapaiyaifāfe, nāskaxō ato yoini iskafakī: “¿Afeskakī mā ea feparapaimē?” ato fata, “Ea kori exe fisti fēxokāfe, ē ōinō,” ato faino,

16 kori exe fisti fēxofafono, nā kori exe ōiyanā Jesús ato yōkani: “¿Tsōa femānā na keskaramē? ¿Tsōa aneri na kori exe ano keneamē?” ato faino, kemanifo iskafakakī: “Nōko xanīfo César keskara,” faifono,

17 Jesús ato yoini iskafakī: “Akka na kori exe Césarnākē César inākāfe, akka Niosnākē Niosri inākāfe,” ato faino, “¡Kee! ¡Nikakapo! Āfe meka finakōia tsōakai finōtiroma,” ikanax rateyanā yoinānifo.

“Yora naax anā otoax, ¿afeskatiromē?” ixō Jesús yōkanifo

(Mt. 22.23-33; Lc. 20.27-40)

18 Nāskakē saduceofo Jesús ōifokani fonifo. Nā saduceofāfe yoimisfo iskafakakī: “Yora naaxkai

anã afeskax ototiroma,” ixõ yoimisfo. Nãskakẽ mã fokaxõ yõkanifo iskafakakĩ:

¹⁹ “Maestro, Moisés noko kirika kenexoni iskafakĩ yoikĩ: ‘Feronãfake fetsa ãfiyax natiro afeta fake akamax, akka nã kẽro ifomafa onefẽtsa fitiro, afeta fake axiki nã fake nã onefetsa naitanã inõ.’

²⁰ Akka nã nane tii siete feronãfake inifo. Āto ochi iyoa ãfiyai taeni, mã ãfiyax afeta fake akamax nani.

²¹ Nãskata nãa chipoko fẽtsa nã kẽro ifomafa fini. Nãskarifiã nãari nani afeta fake akamax. Afianã chipoko fẽtsari fini, nãari nani afeta fake akamax.

²² Nãskakẽ nã siete feronãfakefãfe nã kẽro fĩpakanax, afeta fake akanamax nai keyonifo. Chipokõitani nã kẽrori nani.

²³ “Nãskakẽ mã otokaxõ, ¿fatoto nã kẽro fiximẽ, nã fistimã fĩpakaxõ?” ixõ yõkaifono,

²⁴ Jesús ato kemani: “Mãkai afaa tãpiama. Na Niospa meka yoikĩ kenenifokairoko mã õikatsaxakĩ. Niospa ãfe sharaõnoari mã õimisma.

²⁵ Yorafo nakanax mã anã otokanax, anã ãfiyatirofoma, anãri Āto ãfi feta fake atirofoma. Askatamaroko nã ãjiri nai mẽranoafo keskara itirofo.

²⁶⁻²⁷ Akka, ¿a yorafo nakanax anã otokiaifoõnoa yoikĩ Moisés kirika kenekĩ yoiniõnoa mã anemis-mamẽ? Niospa fana koofai mẽraxõ Moisés yoini iskafakĩ: ‘Ēfi mĩ xinifãfe Āto Nioskõi, Abraham ikaino, Isaaca ikaino, Jacobo ikaino,’ ixõ Niospa yoini. Akka Niospa naafoma keskara ato õi, aõnoax keyokõi niafono. Akka mãkai afaa tãpiama mã mã chanĩmis,” ixõ Jesús ato yoini.

“Akka, ¿fato meka sharafĩnakõiamẽ, nã Niospa

*shināmanaino Moisés ato yoiniraka?” ikaxō farise-
ofāfe Jesús yōkanifo
(Mt. 22.34-40)*

²⁸ A Moisés yoikī kirika keneni keskara ato tāpimamis Jesús ano nokoni, Jesús anoax ato fe yoināino māmāi tāpixō Jesúsmāi ato kemasharakōiaino. Nāskaxō akairi yōkani: “Akka, ¿fato meka sharafinakōiamē, nā Niospa shināmanaino Moisés keneniraka sharafinakōia?” ixō yōkaito,

²⁹ Jesús kemani iskafakī: “Niospa yoini iskafakī: ‘A sharafinakōia ē mia yoinō nikapo. Nā israelifo nikasharafe, nōko Ifo Nios fisti nōko Ifokī anā ano fetsamaki.

³⁰ Nōko Ifo Nios noisharakōikāfe nōko ōitifoyaxō, nōko yōshi sharafofaxori noikāfe. Nōko mapo mēraxori shināsharakāfe, nōko kerex sharafofaxō, ixō nā meka shara Moisés keneni.

³¹ Nā ē mato taefakī yoia keskarari nāno fet-sari. ‘Nā mato chaima nikari noisharakōikāfe a mā mā noimesharakōiai keskafakāfe.’ Na meka rafe sharafinakōia Niospa yoini,” ixō Jesús ato yoini.

³² Naskafaito a Moisés yoikī kirika keneni keskara ato tāpimamisto yoini iskafakī: “Mī yoikōi. Maestro, chanīmakoī mī yoimis. Nāno Nios fisti, anā ano a keskara fetsama.

³³ Askatari iskafakī mī yoia, māto ōitifoyaxō Nios noikōikāfe, māto shinā sharafofaxori askafakāfe, māto yōshi sharafofaxori askafakāfe, māto kerexfofaxori askafakāfe, a mato chaima nikafori noisharakōikāfe, a mā mā noimeai keskafakī askatari a afarafo nō Nios inā, nāfo nō finōinīfofana sharakōikī. A nō afara koakī nō Nios ināfori nāfori

nō finōinĩfofana nōko òitifofoxō nō Nios noikōikĩ,”
ixō mĩ yoia fani.

³⁴ Askafakĩ yoisharaito nikakĩ Jesús yoini
iskafakĩ: “Epa Niospa afe yorafo imasharai
keskara mĩri mĩ tãpiax mĩ afe nĩpanaka,” ixō yoiaito,
nikakakĩ tsoa anã tooxinima. Askata anã tsōa
yōkanima.

*“Akka, ¿tsōa fenamē Cristo?” ixō Jesús ato yōkani
(Mt. 22.41-46; Lc. 20.41-44)*

³⁵ Jesús Nios kĩfiti pexefã mēraxō ato tãpimayanã
ato yōkani iskafakĩ: “Akka, ¿afeskakĩ a Moisés yoikĩ
kirika keneni keskara ato tãpimamisfãfe na Cristo
David ãfe fenara fakanimē?

³⁶ Akka Niospa Yōshi Sharapa shinãmanaino nã
David yoini iskafakĩ:

Epa Niospa ěfe Ifo yoini iskafakĩ: ‘Mĩ efe
xanĩfokōi ĩpanakaki. Akka nã mia noikaspaifo mĩ
ato finōkōinō ě ato mĩ nãmã nĩchikai.’
ixō Niospa yoinino David keneni.

³⁷ “Akka, ¿afeskai Cristo David ãfe fena itiomē,
nã David Cristo ěfe Ifora fafiapaonino?”

Nãskakē yōrafã rasi inimanifo Jesús ato yoiaito
nikakani.

*Jesús ato yōani a Moisés yoikĩ kirika keneni
keskara ato tãpimamisfãfe anorima ato yoiaifono
(Mt. 23.1-36; Lc. 11.37-54; 20.45-47)*

³⁸ Nãskano Jesús ato yoiyanã iskafakĩ ato
yoini: “Ōisharakakĩ a Moisés yoikĩ kirika keneni
keskara ato tãpimamisfo tari chainipa safekanax
fofãsamisfoki, askatari nafãfe tãpikōiara noko
fanōfora ipaikani. Yora ichapafano fofãsapaimisfo
noko yoisharakōinōra ikanax, nãfo kakapaimisfo.

39 Nāfāfe ichanāti pexe mēraxō tsaoti sharakōi fenamisfo noko ōinōfora ikaxō. A piaifo anoaxri ano tsaopaikakī sharakōi ano tsaopaimisfo.

40 Nāskarafāfe kēro ifomafafo ato pexe fīamisfo, nō mato Nios kīfixonira ikaxō chaikōi Nios kīfimisfo atoki kaxemetsamapaiyanā. Nāfo omiskōi finakōixikani Epa Niospa ato omiskōimanaino,” ixō Jesús ato yoini.

Kēro ifomafa afaamais fixō Epa Nios ināsharakōini

(Lc. 21.1-4)

41 Nāskata Jesús tsaoxō ōini yorafāfe a kori naneti mēra kori naneaifāfe Nios kīfiti pexefā mēraxō. Akka nā afama mīshti ichapayafāfe kori naneti mēra kori ichapa nanenifo.

42 Nāskafaifono nāno kēro ifomafa nokoni. Nā kēro ifomafa afaamais fixō āfe kori exe rafe nā kori naneti mēra āfe kori nanekī mitofaito Jesús ōini.

43-44 Nāskafaito ōikī Jesús aōxō tāpimisfo kenaxō iskafakī ato yoini: “Chanīma ē mato yoikōi, nā kēro ifomafa afaamaisfixō fetsafo finōmainīfofā āfe kori exe rafe nā kori naneti mēra nanea. Akka nā kori ichapayafāfe nā kori naneti mēra mā āto kori nanefikakī tsōa keyo naneama. Akka nā kēro ifomafa afaamaisfixō nā kori naneti mēra āfe kori nanekī mitokōia. Nāskakē a piāi anā afanā fitiroma,” ixō Jesús ato yoini.

13

Jesús ato yoini na Nios kīfiti pexefā pāoixii ixō
(Mt. 24.1-2; Lc. 21.5-6)

¹ Mā Jesús a Nios kīfiti pexefā mēranoax tsekeano, a aōxō tāpimis fētsa yoini iskafakī: “Maestro, ōipo,

nōko Nios kīfiti pexefo tokirifo petsanāmeakea sharastakōifo,” ixō yoiaito,

² Jesús kemani iskafakī: “¿Mā mī ōimē na Nios kīfiti pexefo? Akka, ¿na tokirifo anā petsanamexima chipo maoui fetsexii anākai na tokirifo petsanāmxima?” ixō Jesús ato yoini.

Afaa afeskaximākai mā chaima nōko mai keyoaino Jesús ato yoini

(Mt. 24.3-28; Lc. 17.22-24; 21.7-24)

³ Nāskakata machi Olivos ano fonifo, anoxō ōiafo Nios kīfiti pexefā chaima ini. Nāno Jesús tsaono, Pedro ikaino, Santiago ikaino, Juan ikaino, Andrés ikaino one yōkanifo tsōa ato nikayamanō iskafakakī:

⁴ “Nō tāpapaikai noko yoife. Na mī yoiai keskai afetiā iximākai, afeskaxō nō tāpitiromakī. Askayoamano afaa nō ōitiromakī noko tāpimafe,” faifono,

⁵⁻⁶ Jesús ato kemani iskafakī: “Kexemesharakani mā ato nikaino mato afara chakafamatirofokī. Yora ichapafo fekani kiki, ēfe aneōnoa mato yoikī iskafakani kiki. ‘Ē Cristoki,’ ikaxō yora ichapafo ato pārapaikani kiki.

⁷ “Akka yorafo retenāifāfe nikai rateyamakāfe. Nā ē yoiai keskai nāskakōixii. Akka fena nōko mai keyoima, chipo ixii.

⁸ Akka yorafo mai fetsa anoax mēenāpaiyaifono, yora fetsafori mai fetsa anoax retenāxikani. Nāskaifono mai fetsa anoax mai naya naya ixii. Askatari fonāiki finakōixikani afaa pikanima. Askatari mekai finakōixikani. Nāskai omiskōi taexikani.

⁹ “Akka māroko kexemesharakāfe. Mato achikaxō xanīfofo mato inākani kiki, nāskakaxō

mato koshakani kiki ichanāti pexe mēraxō. Xanīfofōfāfe ferotaifi mato iyoxikani. Eōxō mato askafaifono, mā ato yoisharakōixikai.

¹⁰ Akka a omiskōiaifo nokoyoamano efe ĩpaxanōfo ěfe meka sharaōnoa ato yoikāfe, nā mai tio anoafō.

¹¹ Akka mato achikaxō mato iyoxikani, xanīfofo mato ināxikakī. Shināchakayamakāfe nō ato afaa faikaimē iyamakāfe. Mā afaa shināpaimakai, nā Niospa mato shināmapaiyai anori mā ato yoikai. Akka mā mekaimakai Niospa Yōshi Shara mekai kiki.

¹² A yorafāfe āto extofo yora fetsafo ato achimaxikani ato retenōfo. Ato apafāferi āto fakefo yora fetsafo ato achimaxikani. Nāskarifiakī āto fakefāfe āto apakōifo ato chakafakī mekafaxikani, yora fetsafāfe ato retenōfo.

¹³ Akka eōxō keyokōichi mato noikaspaxikani. Akka mato noikaspafiaifono mā eōnoax omiskōifiki mā ěfe meka nikasharakōiaito ě mato kexesharakōixii Epa Nios fe mā isharapakexanō.

¹⁴ “Nā Niospa meka yoimisto Daniel a inōpokoai yoikī kirika kenei Nios kīfiti pexefā mēra afara chakakōi faxikani kiki ixō yoikī. (Nāskakē na kirika kenea anexō tāpikāfe.) Nā chakafinakōia ōikanax, nā Judea anoafō machi keya ano ichorisa-takāfe.

¹⁵ Askatari āfe pexe māmākīa tsoxō ato fichiax koshikōi fotopakekafā āfe afaa fiamax ichotiro.

¹⁶ Askatari a āfe tare ano yonoaito anā oxō āfe rapati fitiroma.

¹⁷ Askatari a kēro fake naneafō fe a fake yome pishta chocho amaifo omiskōixikani māmāi yorafō

omiskõifinakõiaifono.

¹⁸ Askatamaroko mā Epa Nios kīfikāfe mato kexesharanõ ichoxõ yõtaino matsi mexikakīma.

¹⁹ Askatari a omiskõiaifo nokoxii, taeyoi askakat-saxakīma. Nā Niospa yora onifakī taefanitīa tsōa askara õiyomisma. Askatari anā tsoa chipo omiskõinakama.

²⁰ Akka a omiskõiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskõinõfoma xateni atomāi katonixakī.

²¹ “Akka fētsa mato yoikī iskafaino: ‘Õikapo nakīa Cristo,’ mato fayanā: ‘Oa onokīa, õikapo,’ mato faito nikayamakāfe.

²² Akka nā chanīmisfo fekani, ē Cristora ixikani, nāfo nō Niosxõ nō mato yoirā ikani. Nāskakaxõ tsōa atiroma keskara fakani Satanás yōshixõ mato pārapaikakī. Nā Niospa ato katoafori nāfo ato pārapaikani.

²³ Akka õisharakāfe afetīama keyokōi mē mato yoyiomiski,” Jesús ato fani.

Niospa Fake fotoaino afe keskara iximākai ixõ Jesús ato yoini

(Mt. 24.29-35, 42-44; Lc. 21.25-36)

²⁴⁻²⁵ Anā Jesús ato yoini iskafakī: “Akka nā penatari, nā omiskõiaifo mā keyoano, xini fakishkōi ixii, oxeri anā chaxaxima. Fishifori nai mēranoax pakei fetsexii, askatari nā nai mēranoafo naya naya iki fetsexii.

²⁶ Askatari ea õixikani nai mēranoax nai kōifoya ē fotoaito sharafinakōia ēfe sharafoya ē fotoxii.

²⁷ Nāskatari ēfe ājirifo ē nīchixii a ē ato katoafo ato ichanāfatanõfo, a chai ikafo ekeki efenõfo.

²⁸ “Akka shinãkapo ã mato yoinõ. Mã yõkkafiaino mã tâpitiro ãfe pei sirikiaito. Nãskakẽ ãfe peifo keyopaito õikĩ mã tâpitiro mãmã chaima xiniaito.

²⁹ Nãskarifiakĩ afarafo afeskaraito õikĩ mã tâpitiro mẽ chaima oaino askai fetsexii.

³⁰ Ë mato pãraima ã mato yoikõi, na ã mato yoiai keskara nono mai anoxõ yorafãfe nayokaxõma õiyokani.

³¹ Akka nai fe mai keyoi. Akka ãfe meka fisti keyonakama, nã ã mato yoiai keskakõi.

³² “Afetãra nai mẽranoax ã oxii tsõakai tâpiama. Nã ãjirifãfe nai mẽra ifiakaxõ tâpiafoma. Ërikai tâpiama. Ëfe Epa Nios fistichi tâpia.

³³ “Nãskakẽ mã itipinĩsharayanã kexemesharakãfe Epa Nios kĩfiyanã. Mã tâpiamaki afetãra ã oxikai.

³⁴ Akka feronãfake fẽtsa fakira chaikakĩ, akka kayoxoma a yonoxomisfo yoini ãfe pexe kexex-onõfo. Nãskaxõ ato yono inãketsani yononõfo, akka fẽtsa ãfe pexe fepoti anoxõ kexesharayanã man-anõ yoini.

³⁵⁻³⁶ Nãskarifiyai mãri kexemesharakãfe, mã tâpiamaki fatora penata ã matoki nokorisatanikai. Xini kaino nokoyamata, yamenakefanaino iyamata, takaranã akaino iyamata, fakishparikõi ã matoki nokotiroki. Iskaratã oimara ea faax mã oxakẽ ã mato fichitoshitiroki, nãskakẽ itipinĩsharaxõ ea yonoxosharakãfe isharakõixõ.

³⁷ Nã ã mato yoiai keskafakĩ, keyokõi ã yorafa yoi itipinĩsharakãfe ixõ ã ato yoi,” Jesús ato fani.

*“¿Afeskaxõ nõ Jesús retetiromẽ?” ixõ shinãnifo
(Mt. 26.1-5; Lc. 22.1-2; Jn. 11.45-53)*

¹ Mã chaima oxa rafeta ãto fista Pascua ikaino, nõ fistatĩa pãa faraxatimais pipaonifo, nõ Niospa ãjirinĩ Ejipto anoxõ ãto fake iyoafo rētenima shinãkakĩ. Nãskaifono a ato Nios kĩfixomisfãfe ãto xanĩfofo feta a Moisés yoikĩ kirika keneni keskara ato tãpimamisfãfe, afeskaxoma Jesús pãrapainifo pãrakaxõ retexikakĩ.

² Akka achixõ retepaifikani, iskanifo: “Fistatĩakai nõ achitiroma yorafã rasi mekai fetsekani nokoki õitifishkitirofo,” ikanax yoinãnifo Jesús retepaifikani.

*Kẽromã Jesús shinãkĩ ãfe mapoki pirofomã nachini
(Mt. 26.6-13; Jn. 12.1-8)*

³ Akka Jesús Betania ano ini, Simón pexe ano. Nã Simón “Rashkishiai” fapaonifo. Nãato pexe ano Jesús mĩsa kamaki tsaano, nõno akiki kẽro fisti oni manishomo “alabastro” foikai. Na manishomo mẽra xinia pirofomã osia nanea nakas sharakõi ini, ãfe ane “nardo.” Nã pirofomã kopipaekõi ini, na manishomo ãfe fepoti fepexõ maneakefofã Jesús ãfe mapoki nachini, nõ kẽromã.

⁴ Askafaito õikani nõ anoafo õitifishkiyanã ãa ranã yoinãnifo iskakani: “¿Afeskakĩ na kẽromã na pirofomã sharakõi chakanafaimẽ?”

⁵ Ato minixõ, aõxõ kori ichapa fixõ a afaamaisfo ato inãkerana,” ikaxõ nõ kẽro feratenifo.

⁶ Askafaifãfe õikĩ Jesús ato yoini iskafakĩ: “Enekãfe. ¿Afeskafakĩ na kẽro mã fekaxtefaimẽ? Na ea iskafai sharakĩ,” ato fani.

7 “Akka nã afaamaisfori mato fe ipanakafo, fatora penata mã ato sharafaxopaikĩ mã ato sharafaxotiro. Akka eakai mẽxotaima mã ea anã õima.

8 Akka na kēromã ea iskafakĩ ea sharafa. Ë nayoamano taefakĩ êfe yoraki pirofomã nachia.

9 Ë mato pãraima, fanĩxõra na meka shara eõnoa yoikakĩ nã mai tio anoxõ na kēromã ea iskafaõnoa yoixikani. Askatari na kēroõnoa shinãpakenakafo, shinãmakiyamaxikakĩ,” ixõ Jesús ato yoini.

*Judaspa aõxõ tãpifikatsaxakĩ Jesús ato achimani
(Mt. 26.14-16; Lc. 22.3-6)*

10 Nãskafakĩ Jesús ato yoiaino nã afe rafemis fetsa nã docefo anoa, nã Judas Iscariote a ato Nios kĩfixomis xanĩfofo fe mekaikai kani. Mã kaxõ ato yoini iskafakĩ: “¿Afe tii mã ea kopifatiromẽ ê mato Jesús achixonõ?” ato feito,

11 nikakani inimakõiyã yoikĩ iskafanifo: “Nõ mia kori ichapa inãikai,” faifono, nãskakẽ Judaspa shinãni: “Afeskaxomãi ã Jesús ato achimanõ,” ixõ shinãni.

*Mã chaima reteaifono Jesús aõxõ tãpimisfo feta
yãtapake pini
(Mt. 26.17-29; Lc. 22.7-23; Jn. 13.21-30; 1 Co. 11.23-26)*

12 Akka nã fistatĩa pãa faraxatimais pipaonifo. Afa penatari Pascua fistatĩa ovejanã fake retexõ pinifo. Nãskano aõxõ tãpimisfãfe Jesús yõkanifo. “¿Fanĩ mĩ fichipaimẽ ano kaxõ nõ itipinĩ fanõ, anoxõ Pascuatĩa yãtapake pixiki?” ixõ yõkaifono,

13 nãskakẽ Jesús aõxõ tãpimis rafe nĩchini, iskafakĩ ato yoiyanã: “Pexe rasi ano fotakãfe. Nãnoa

feronãfake fisti mã fichikaikai keshoki faka tet-saomexõ foikaino, nã feronãfake fe fõtakãfe.

14 Akka nã feronãfake ikiai ano afe ikixõ, nãnoa pexe ifo yõkakãfe iskafakĩ: ‘Nõko Maestro noko yoikĩ iskafaa: “Nã pexe ifo yõkakãfe, ¿Fato kene mëraxõ Pascua fistatĩa eõxõ tãpimisfo feta yãtapake ã pitromãkĩ?” ixõ yõkakãfe.’

15 Mã askafakĩ yõkaito pexe kene efapa fomãkĩanoa mato ispai kiki mã itipinĩkõia. Nãno noko itipinĩsharafaxokãfe,” Jesús aõxõ tãpimisfo rafe fani.

16 Ato askafaino aõxõ tãpimis rafe fonifo. Mã fokanax pexe rasi ano nokonifo. Mã nokokaxõ nã Jesús ato yoia keskarakõi fichitoshinifo. Nãnoxõ itipinĩ fanifo Pascua fistatĩa pixikakĩ.

17 Mã fakishaino Jesús aõxõ tãpimis docefo fe nokonifo.

18 Mã fokaxõ mĩsa ano tsoaxõ piaifono Jesús ato yoini. “Ë mato pãraima fatora na mã efeta piai fẽtsa mã ea ato achimafainaka,” ato faino,

19 nikakani shinãmitsakõïyanã maikiri fepepake-fofãnifo. Nãskakanax ãa ranã yoinãnifo iskakani: “¿Tsoamẽ, ãraka?” Fetsari iskani: “Õitsai, ãraka,” iki fetsenifo.

20 Askaifono Jesús ato kemani: “Nã mã docefo anoafãfe, nã mã efeta sapaki piai fẽtsa mã ea yõaikai ea achinõfo.

21 Nã Niospa meka yoiki, eõnoa yoikĩ kenenifo keskai ã askakõi. Akka na feronãfake ea ato achimafax akairi omiskõikõixii. Akka na feronãfake shara ikerana fakeyamanixakĩ,” ixõ Jesús ato yoini.

²² Piaifono Jesús pãa tsomainĩfofã. Apa Nios kĩfiki aicho fata, mã kaxkepakexõ ato inãni, iskafakĩ ato yoiyanã: “Na ěfe nami keskaraki pĩkãfe,” ato fani.

²³ Nãskata mã Apa Nios aicho faxõ, kecho tsomainĩfofã ato inãni. Nãskakẽ mã ato inãno keyokõichi ayanifo.

²⁴ Nãskaxõ ato yoikĩ iskafani: “Nafi ěfe imi keskaraki. Mẽ naino ěfe imi foxii. Keyokõi yorafãfe afara chakafamisfono ě atoõnoax naikai. Ě askaino Niospa ato potapakenakama. Ě ato naxõi ãto chaka ato soaxoxiki.

²⁵ Ě mato pãraima. Ě mato yoikõi ě anã mato feta na fimi ene ayaima. Mẽ nai mẽra kai. Nã ěfe Epa Nios xanĩfokõi ika anoxõ ě anã mato feta na fimi ene shara ayaxii,” ixõ ato yoini.

*“Ě Jesús õimisma,” Pedro ixiaino Jesús ato yoini
(Mt. 26.30-35; Lc. 22.31-34; Jn. 13.36-38)*

²⁶ Nãskata mã fanãiki xatekata machi Olivos ano fonifo.

²⁷ Nãskata Jesús ato yoini iskafakĩ: “A na fakishi keyokõi mã ea shinãmakĩ fetsei. Akka kirika ano kenekĩ iskafakĩ yoinifo: ‘Ãfe ifo reteafono, ãfe ovejafõ ichoi fetsetirofo,’ ixõ kirika ano kenenifo,” ato fani.

²⁸ “Akka ea retefiafono mẽ otoax Galilea ano ě nokoi taexii mã nokoamano,” ixõ ato yoini.

²⁹ Ato askafaito nikakĩ Pedro kemani. “Akka keyokõi shinãmakifiaifono ěkai mia shinãmakima,” ixõ yoiaito,

³⁰ nikakĩ akka Jesús yoini iskafaki: “Ě mia pãraima na fakish fistichi takara keoi rafeyamano, ‘Ě Jesús õimismara,’ mã ato fai tres fakĩ.”

³¹ Askafaito nikakĩ anã Pedro kemani. “Maa. Mia retefiaifono ã mefe nai. Ë õimismara ã mia faima,” fani.

Pedro askafaito nikakakĩ keyokõichi askafakĩ fetsanifo.

Getsemaní anoxõ Jesús Apa Nios kĩfini
(Mt. 26.36-46; Lc. 22.39-46)

³² Nãskakata nã ifi mapoa ãfe ane Getsemaní ano nokonifo. Nãnoxõ Jesús aõxõ tãpimisfo yoini iskafakĩ: “Nono tsaokãfe. Ë Epa Nios kĩfiyotanõ,” ato fani.

³³ Akka Pedro iyota, Santiago* iyota, Juan iyota ato fani. Nãskaxõ ãfe yora meeni shinãmitsakõïyanã fekaxtekõïaito,

³⁴ nãskakĩ ato yoini: “Ëfe yõshi shinãmitsakõï napaiyaito ã meikai. Nono nẽtekãfe, akka mã oxaki,” ato fani.

³⁵ Nãato askafata ori chaimashta Jesús ares kani. Nãnoxõ ratokonõ mai chachipakefofã Apa Nios kĩfikĩ iskafani: “Epa, ea mã kexetiromakĩ ea kexefe ea reteaifono ã omiskõinõma.

³⁶ Epa, mã keyokõï tãpiakĩ. Ea mã ifipaikĩ ea mã ifitiro ã omiskõinõma. Akka nã ã apaiyai keskafakĩma nã mã ea amapaiyai keskafafe,” Apa fani.

³⁷ Nãskata mã aõxõ tãpimisfo ano oxõ õia oxafõ ato fichitoshini. Nãskaxõ Pedro yoini: “Simón, ¿mã mã oxamẽ? ¿Afeskakĩ mã pishta oxa tenetiromamẽ?”

³⁸ Moikaxõ Epa Nios kĩfikãfe Satanás chakata mato chakafamapaiyai keskara axikakima. Chanĩma, nã Epa Niospa mato amapaiyai keskara

* 14:33 Santiago ãfe ane fetsa Jacobo ini.

mãto shinã mēraxõ mã apaifikĩ mã atiroma. Akka mãto yora pachikõikĩ,” ixõ Jesús Pedro yoini.

³⁹ Ato askafata anã kani Apa Nios kĩfikai a yoitana keskafakĩ.

⁴⁰ Nãskata anã oxõ ato fichitoshini aõxõ tãpimisfo oxafono, oxa paemei fetsoafono, a Jesús ato yoiiai keskara tãpikaxoma tsõa kermanima.

⁴¹ Nãato askafata anã ato makinoax kani orish-taxõ Apa Nios kĩfikai. Mã Apa Nios kĩfitani oxõ ato yoitoshini iskafakĩ: “¿Ai mã oxamē tenekõiyã? Moikãfe. Akka iskaratĩa a ea ato achimaniyoai mã chaima oi kiki. Yora chakafãfe ea achifenõfo ato efe ikiki.

⁴² Fininĩfofãkãfe nõ kanõ. Mã chaima oi kiki a ea ato achimaniyoai,” Jesús ato fani.

Jesús achinifo

(Mt. 26.47-56; Lc. 22.47-53; Jn. 18.2-11)

⁴³ Jesús ato yoiaino Judas nokoni, nã Judaspa Jesúsxõ tãpifikatsaxakĩ, yorafã rasifo fe oni. Nã yorafo kenofoya ifi xatefoya fenifo, a ato Nios kĩfixomisfãfe ãto xanĩfofo feta a Moisés yoikĩ kirika kenenĩ keskara ato tãpimamisfãfe, a xanĩfo fet-safãferi ato nĩchiafono.

⁴⁴ Judaspa nã ato efeaito iskafakĩ ato yoiyoni: “A ě kokoki tsoo akaito õikĩ koshi achirisafaxikãki metexkere axõ iyotaxikãki,” ixõ ato yoini.

⁴⁵ Nãskata Judas mã Jesús ano nokoxõ iskafakĩ yoini: “¿Maestro, mĩmē?” ixõ kokotoshini.

⁴⁶ Nãskafaito õikakĩ nã Judas fe foafãfe Jesús achinifo.

⁴⁷ Akka Jesús achiaifãfe õikĩ a aõxõ tãpimis fẽtsa ãfe keno chainipa tsekainĩfofã, a ato Nios kĩfixomisfãfe ãto xanĩfãfe ina paxteni.

48 Nāskakē Jesús yorafo yoini iskafakī: “¿Afeskai kenofoya ifi xatefoya mā oamē ea achiyoi oa ē yometso keskarakē?

49 Pena tii ē mato fe itiani Nios kīfiti pexefā mēraxō ē mato tāpimani, akka mā kai ea achipaimisma. Akka nā eōnoa yoikī kenenifo keskafakī mā ea achi,” ixō Jesús ato yoini.

50 Ato askafaino aōxō tāpimisfo Jesús ōifaikani. Ichoi fetsenifo a makinoax.

51 Akka naetapa fistichi sabanānā rakoxō Jesús chīfafainaito ōikakī achinifo.

52 Akka achiaifono āfe sabanā potafaini chitoria ichoni.

Xanīfo finakōiafo ano Jesús iyonifo

(Mt. 26.57-68; Lc. 22.54-55, 63-71; Jn. 18.12-14, 19-24)

53 Nāskakē Jesús achikaxō iyonifo a ato Nios kīfixomisfāfe āto xanīfāfe pe xe ano. Nāskakē keyokōi anofistiax ichanānifo a ato Nios kīfixomisfāfe āto xanīfofo fe a judeofāfe āto xanīfofo a Moisés yoikī kirika kene ni keskara ato tāpimamisfori ato fe inifo.

54 Akka Pedro acho kakī chai ixō ōifoni. Nāskata a ato Nios kīfixomisfāfe āto xanīfāfe pe xe emāiti nokoni. Nānoax a Nios kīfiti pexefā kexemisfo fe chii ketefax ato fe yooni.

55 A ato Nios kīfixomis xanīfofofāfe a āto xanīfofinakōiafo fe is kai yoinānifo: “Afeskaxomāi nō pāranō na Jesús afara chakafara ixō retexiki. Akka afaakai chakafa nō nikaima,” inifo.

56 Nāskaifono yora ichapafāfe, “Na Jesús afara chakafaito nō ōia,” ixō pāraketsanifo. Askafafiakakī anoris yoiketsanifoma. Āa chanī fetsenifo.

57 Askafaifono ranāri fininĩfofākāta āa mekafakakĩ chakafakĩ fetsanifo iskafakakĩ:

58 “Nō nikaino na feronāfake iskaita: ‘Na Nios kĩfiti pexefā yorafāfe akafo ē pāofaxii. Nāskata tres nia oxata ē anā fetsafaxii, anā yorafāfe efeta akanima, eres fisti ē aki,’ ixō yoiaito nō nikaita.”

59 Askafakĩ yoifikakĩ tsōa anoris yoinifoma, āa chanĩ fetsenifo.

60 Nāskafaifono a ato Nios kĩfixomisfāfe āto xanĩfāfe ato nēxpakĩa niinākakā iskafakĩ Jesús yōkani: “¿Mĩ kemamitsaimamē afamē na mĩōnoa meka chaka yoiiaifo?” ixō yoini.

61 Askafaino akka Jesús tooxinima, pishtakai kemanima. Afianā a ato Nios kĩfixomisfāfe āto xanĩfāfe iskafakĩ yōkani: “¿Mĩmē Cristo? ¿Nā Nios nipanakato āfe Fakemē, mĩ?”

62 Askafaito nikakĩ Jesús kemani: “Ēje, ēkĩa Niospa Fake. Akka mā ea ōixii ēfe Epa ketaxamei āfe pōya kayakai aōri ē tsāokē xanĩfo finakōia ēfe Epa fe. Askatari mā ea ōixii nai kōi mēranoax ē anā fotofaito,” Jesús ato fani.

63 Askafaito nikakĩ a Nios ato kĩfixomisfāfe āto xanĩfāfe āfe rapati faxteni fetsafāfe tāpinōfo nā xanĩfo ōitifishkikaito. Nāskaxō ato yoini iskafakĩ: “Mā nōakōi nō nikakĩ noko anā tsōa yoitromaki nō tāpinō.

64 Mā mā nikakĩ na feronāfake āfe mekapa Nios chakafakĩ mekafaito. Akka, ¿nō afeskafaimē?” ato faito keyokōichi, “Nanōki,” fanifo.

65 Nāskakata mā fenexkaxō āfe femānāki kemo mechoketsayanā koshaketsanifo iskafakĩ yoiyanā: “Tsōa mia koshamakĩ tāpipo noko yoixiki,” faifono, a Nios kĩfiti pexefā kexemisfāferi fepasketsanifo.

*“Ē Jesús ōimisma,” Pedro ini
(Mt. 26.69-75; Lc. 22.56-62; Jn. 18.15-18, 25-29)*

⁶⁶⁻⁶⁷ Pedro pexefā emāiti ato fe tsaono, nāno akiki a xanīfo yonoxomis xomaya nokoni. Nāno ato fe chii ketefaax tsaoux yooaito ōikī, iskafakī yoini: “Mīri Nazarete anoax Jesús fe kafāsamis,” faino,

⁶⁸ akka Pedro iskafakī kemani: “Ēkai Jesús ōimisma. Ēkai afaa tāpiama tsoaraōnoa mī yoi,” fata, pexefā kāiti ano Pedro nasteinīfofānaino, takara keonākafāni.

⁶⁹ Afianā nā xanīfo yonoxomis xomayato Pedro ōiki, nānoafo iskafakī ato yoini: “A na feronāfake Jesús fe rafemis ōikapo, a nā Jesús Nazarete anoax fe kafāsamis,” fani.

⁷⁰ Akka Pedro anā isكاني: “Maa, ēkai Jesús fe rafemisma,” ini. Nāskaino nā anoafāfe anā Pedro yōakakī iskafanifo: “Chanīma, mīri Jesús fe rafemis. Mīri Galilea anoakī mī mekai nā Jesús mekai keskarakī,” faifono,

⁷¹ akka Pedro ato yoikī iskafani: “Ē mato pāraima, ē chanīaito ea Niospa omiskōimatiro. Niospa tāpia chanīmakōi ē mato yoi. Ēkai na Jesús ōimisma tsoaraōnoa mā yoi,” Pedro ato fani.

⁷² Pedro nāskaino anā takara keoinākafāni. Nāskaino Pedro shinātani nā Jesús iskafakī yoita keskara: “Taeyoi takara keofi rafeamano, ‘Ē Jesús ōimismara,’ mī ea faxii tres fakī,” ixō yoitano, nā shinātani Pedro shināmitsai oiakōini.

15

*Pilato ano Jesús iyonifo
(Mt. 27.1-2, 11-14; Lc. 23.1-5; Jn. 18.28-38)*

¹ Mā penaino a ato Nios kīfixomisfāfe āto xanīfofo ichanānifo, a judeofāfe āto xanīfofo fe, a Moisés yoikī kirika kenei keskara ato tāpimamisfori ato fe inifo. Nā xanīfo fetsafori a ato rafeafori ato fe inifo. Nāskakaxō Jesús metexkere akaxō iyokaxō Pilato inānifo.

² Mā iyoxō ināfono Pilato yōkani iskafakī: “¿Mīmē judeofāfe xanīfo?” askafaito, Jesús kemani: “Ēje, nā mī ea yoiai keskarakī,” Jesús fani.

³ Nāskaino nā ato Nios kīfixomisfāfe āto xanīfofofāfe āa pāarakakī yōaketsanifo.

⁴ Nāskafaifono anā Pilato yōkaxō iskafakī yoini: “¿Mī ato kemaimamē mīōnoa afara chakafo yoifi-aifono?”

⁵ Askafaito nikakī Jesús tooxanima. Nāskakē Pilato shināni iskafakī: “Kee, ¿afeskakī ea kemaimamē?” ixō shināni.

Pilato ato yoini Jesús retenōfo

(Mt. 27.15-31; Lc. 23.13-25; Jn. 18.38-19.16)

⁶ Akka Pascua fistatīa Pilato karaxa mēranoa nā xinia tii fisti rasi ato kāimapaoni māmāi askafakī feyafakatsaxakī. Nā yorafāfe kāimapaiyaifo ato kāimaxopaoni.

⁷ Akka nā karaxa mēra feronāfake āfe ane Barrabás ika ini. Nāato fetsafo feta yora retemis ini nā āto xanīfo ato pōtapaikī.

⁸ Akka yorafo fenifo. Mā fēkaxō Pilato yōkanifo māmāi askafakī feyafakatsaxakakī.

⁹ Askafaifono Pilato ato kemani: “¿Mā fichipaimē judeofāfe āto xanīfo ē kāimanō?” ato fani.

¹⁰ Akka Pilato tāpini a ato Nios kīfixomisfāfe āto xanīfofofāfe Jesús chakafakī mekafaifono anā

yorafãfe noko nikakanimara ikaxõ, nãskakaxomã akiki efekaxõ inãfono.

¹¹ Akka a ato Nios kîfixomis ãto xanĩfofõfãfe fãsikõ yorafo mekamanifo: “¡Noko Barrabás kãimaxõfe!” ikaxõ Pilato yoinifo.

¹² Askafaifono Pilato ato yõkani: “Akka, ¿na judeofãfe ãto xanĩfora mã fai ã afeska fatiromẽ?” ato faito,

¹³ kemakakĩ fãsikõ iskafanifo: “¡Mastafe!” fanifo keyokõichi.

¹⁴ Askafaifono Pilato ato yoini iskafakĩ: “Akka, ¿na feronãfãke afaa chakafamẽ?” ato faino, anã fãsikõ mekainĩfofãnifo: “¡Mastafe!” fanifo.

¹⁵ Nãskafaifono yorafãfe sharakõ fanõfo Pilato ato Barrabás kãimaxoni. Nãskata mã Jesús ato koshamata, ato nĩchixononi ifi cruz ikaki mastatanõfo.

¹⁶ Nãskakẽ sorarofãfe xanĩfãfe pexe emãiti Jesús iyonifo, nãnoax sorarofõ ichanãnifo.

¹⁷ Nãskakaxõ ãfe rapati pëkakaxõ, rapati õshi nana safemanifo, moxa maiti fakaxori maimanifo.

¹⁸ Nãskakaxõ fãsikõ mekafanifo iskafakakĩ: “¡Aicho, mĩfi judeofãfe ãto xanĩfo!” ikaxõ kaxemetsama fanifo.

¹⁹ Nãskatari tafa xatenẽ mapoki koshaketsayanã akiki kemo mechoketsanifo. Nãskakata akiki ratokonõ mai chachipakefõfã kaxemetsama fanifo.

²⁰ Nãskai mã akiki kaxemetsamakaxõ a rapati õshi nana safemanafo fiakaxõ ãfenãkõ safemanifo. Nãskakaxõ iyonifo mã ifi cruz ikaki mastafokakĩ.

Jesús ifi cruz ikaki mastanifo

(Mt. 27.32-44; Lc. 23.26-43; Jn. 19.17-27)

²¹ Mã Jesús iyoifokakĩ feronãfake Cirene anoa fichinifo, ãfe ane Simón. Alejandro feta Rufo ãto

apa ini. PeXe rasi pasotai inoax oaito, fichikaxõ yoinifo iskafakakĩ: “Na Jesús ãfe cruz foxõikafe,” fanifo.

²² Nãskaxõ Jesús iyonifo ãfe ane Gólgota ano. ãfe ane fetsa Mapo Xao fanifo.

²³ Nãnoxõ fimi ene osia mokakõi Jesús ayama-painifo. Akka Jesús ayakaspani.

²⁴ Nãskafakaxõ mastanifo. Mã mastakanax so-rarofo makex tokoroya kaxenifo. Nã potakĩ kanãto ãfe rapati fiani. Nãskafakaxõ keyofianifo.

²⁵ Rama xini keyaino Jesús mastanifo.

²⁶ Mã mastakaxõ a mãnão tafaraki kenenifo iskafakakĩ: “Judeofãfe ãto Xanĩfokõi,” ikaxõ a mãnão kenenifo.

²⁷ Nãskakaxõ Jesús yafi yometso raferi mastanifo, fetsa ãfe põya kayakai aõri ata, fetsari ãfe põya mishkiori anifo.

²⁸ Afetiama aõnoa yoikĩ keneyonifo iskafakĩ yoinifo: “Nã yora chakakõifo keskarakõi ixõ aõnoa yoixikani,” ikaxõ kenenifo. Chanĩmakõi. Nãskakõi fanifo aõnoa yoikakĩ.

²⁹ Nã ano finõfãifãfe İchayanã ãto mapo rafe rafe ayanã iskafanifo: “Iskafakĩ mĩ yoimis: ‘Nã anoxõ Nios kĩfiti pexefã ã pão axii. Nãskaxõ tres nia oxata ã anã axii,’ ixõ mĩ yoimis.

³⁰ Mĩ ifimetiromakĩ mĩa ifimefe na ifi cruz ikakin-noax fotopakekafãfe,” faifono,

³¹ nãskarifikĩ a ato Nios kĩfixomisfãfe ãto xanĩfofo feta a Moisés yoikĩ kirika kene ni keskara ato tãpimamisfãfe askafanifo akiki kaxemetsamapaikakĩ. Nãskax ãa ranã yoinãkani iskanifo: “Nato fetsafo ififikatsaxakĩ, akka aakai ifimeima.

³² A na Cristo israelifãfe ãto xanĩfo, iskaratĩa nõ õipanã afeskai ifi cruz ikakinoax fotopakekafan-imamẽ, nãskaito nõ chanĩmara faikai,” ikaxõ, nã ayafi mastaforti ãchaketsanifo.

Jesús nani

(Mt. 27.45-56; Lc. 23.44-49; Jn. 19.28-30)

³³ Nãskata xini keya nã mai tio fakishifãkõitani. Nãskax mã xini kaino anã penani.

³⁴ Nãno xini rakano fãsikõi Jesús kenani iskai: “Eloi, Eloi, ¿lema sabactani?” fani. Nõko mekapa iskafakĩ yoini: “Ëfe Nios, ãfe Nios, ¿afeskakĩ mã ea potaimẽ?” fani.

³⁵ Nãskaito nã ano niafãfe nikakakĩ iskafanifo: “Nikakapo, nã ato Niospa meka yoipaoni Elías kenai kiki,” fanifo.

³⁶ Nãskaito nikafaini nãnoa fetsa ichoni xapo keskara fiikai. Nã xapo keskara fimi ene kachaki momoxõ tafa xate kaxkexõ akiki nẽtaxõ ayama-paini, iskafakĩ ato yoyanã: “Enekãfe nõ õinõ Elías oi kiki fotomaniyoi,” ixõ ato yoini.

³⁷ Nãskakẽ Jesús fãsikõi eaita nani.

³⁸ Nãskakẽ sama nami Nios kĩfiti pexefã mẽranoax naki rafekõi faxtepakekafãni fomãkĩanoax.

³⁹ Nãskaito õikĩ nã soraro xanĩfãfe Jesús eaita naito õikĩ chaimashta nĩxõ iskafakĩ yoini: “Chanĩma, na feronãfake Niospa Fake ika.”

⁴⁰ Askatari kãrofãferi chai nikaxõ õinifo. Nãno ato fe María Magdalenari ini, María fetsari ini, Jacobo feta José ãto afa ini. Saloméri ato fe ini.

⁴¹ Nã kãrofãfe Jesús chĩfamisfo inifo, pimaxikakĩ Jesús Galilea ano ikano. Nãnori kãro fetsafo inifo, Jerusalén anoax afe foitaxakakĩ.

Jesús makex kini mēra maifanifo
(Mt. 27.57-61; Lc. 23.50-56; Jn. 19.38-42)

⁴² Penama safaro ikaino judeofāfe itipinīfapaonifo, nā safaromāi āto teneti penakē, nā yātapake

⁴³ José oni, nā Joséri judeofāfe āto xanīfo. Nāato Nios xanīfo manapaoni, nā José finakōixō Pilato ano ikikaixō Jesús āfe yora yōkani.

⁴⁴ Askafakī yōkaito nikai Pilato rateni, “¿Mā Jesús naamē?” ikax. Nāskaxō soraro xanīfo kenani yōkaxiki mā Jesús naamakī.

⁴⁵ Nāskafaito soraro xanīfāfe yoini: “Mā naakīa,” faito, Pilato Jesús āfe yora José ināni.

⁴⁶ Nāskakē José sama sharakōi fixō nā samapa Jesús āfe yora rakoni. Nāskaxō a makex kini fanifo mēra rātani. Nāskaxō makexefanē nā kini feponi.

⁴⁷ Akka María Magdalena feta María José āfe afa nā maifaafō anoxō ōinifo.

16

Jesús otoni
(Mt. 28.1-10; Lc. 24.1-12; Jn. 20.1-10)

¹ Mā pena teneti finōano María Magdalena ikaino, María fetsa Jacobo āfe afa ikaino, Salomé ikaino, nā tiito pirofomā fonifo, Jesús āfe yora raish akī foxikakī.

² Fakishparikōi fonifo mā pena teneti finōano nāskanax a Jesús maia ano nokonifo, mā xini keyaino.

³ Mā nokokanax āa ranā yoinākani iskanifo: “¿Tsōa na kini anoa tokiri noko fēpexotiromē?” ikanax yoinānifo.

⁴ Akka òiafo a kini aõ fepoitafo a tokirinĩfã, mã fepekemea ini, anã fepoa inima.

⁵ Nãskakẽ nã kini mẽra ikifaikakĩ òiafo. Nã kini mẽra naetapa tsaoa ini, nã nõko põya kayakai aõri. Rapati chainipa oxokõi safeax, nãskaito õikani ratekõinifo.

⁶ Nãskaifono nãato ato yoini iskafakĩ:

“Rateyamakãfe, Jesús Nazarete anoa mã fe-naikai nã ifi cruz ikaki mastaitafo mã otoaki anã nonomaki. Òikapo a rãtaitafo ano.

⁷ Fokaxõ aõxõ tãpimisfo yoitakãfe, Pedrori yoikakĩ mã nokoamano nã Galilea ano nokoi taei kai kiki. Nã mato yoifafaina keskara nãrixõ mã òikaikai,” ixõ ato yoiaino,

⁸ nãskakẽ nã kẽrofo fonifo nã kini anoax ato yoiaito nikafaikani. Ratei choayanã ato yoini-foma, mesemãiakaki.

*Jesús María Magdalenaki nokoni
(Jn. 20.11-18)*

⁹ Mã pena nomĩkonõ fakishpari Jesús otoitaxaki, María Magdalenaki nokoi taeni, nã María maki-noa siete niafaka yõshi chakafo Jesús põtani.

¹⁰ Nãato kaxõ a afe rafemisfo ato yoikai kani a òia keskara. Kaxõ ato òia shinãmitsakani oiaifãfe ato õini.

¹¹ “Mã nõko Ifo Jesús otoakĩ mẽ òiaki,” ixõ ato yoiaito, tsõa chanĩmara fanima.

*Jesús aõxõ tãpimis rafeki nokoni
(Lc. 24.13-35)*

¹² Mã askata fetsa keskarax Jesús aõxõ tãpimis rafeki nokoni fãi foaifono.

¹³ Nã rafetari a afe rafemisfo yoifokani fonifo. “Mã nõ Jesús òiaki,” ato faifono, tsõa ato nikanima.

*Jesús aōxō tāpimisfo yoini aōxō keyokōi
yoifofāsafatanōfo*

(Mt. 28.16-20; Lc. 24.36-49; Jn. 20.19-23)

14 Nāskata chipo Jesús aōxō tāpimis oncefoki nokoni, mīsa ano tsoxō piaifono. Mā atoki nokoxō iskafakī ato yoini: “¿Afeskakī mā ato chanīmara famamē mē otofiano nā ea ōiafāfe mato yoiaifono?”

15 Nāskaxō ato yoikī iskafani: “Nā mai tio ano fokaxō na meka shara eōnoa keyokōi ato yoitakāfe mē otoakī āto chaka ato soaxoxiki efe īpaxanōfo.

16 Akka na meka shara chanīmara fakanax, faka mēra iki maotissimeax ēfe Epa Nios fe nīpanakafo. Akka na meka shara eōnoa chanīmara fayamakanax, nāfo omiskōipakenakafo.

17 Akka nā ea chanīmara faifāfe, ēfe aneōxō ato makinoa niafaka yōshi chakafo potatirofo. Nāskakanax meka fena sharapa mekatirofo.

18 Nāskakaxō rono tsoatirofo nāskakaxori rao paekōi ayakanax afeskatirofoma. A isinī ikaifori ato ramāifono sharatirofo,” ixō Jesús ato yoini.

Jesús nai mēra kani

(Lc. 24.50-53)

19 Nāskafakī ato yoita, nōko Ifo Jesús ronoinākafāni nai mēra kai. Mā nai mēra kaax Apa Nios ketaxamei tsaoni afe xanīfokōi ixiki.

20 Mā Jesús nai mēra kaano aōxō tāpimisfo fonifo. Nā mai tio anofo aōnoa meka shara yoifokani afe nīpaxanōfo. Nōko Ifāfe ato axōfaino aōxō aōnoa meka shara yoikōinifo, tsōa atiroma keskafakī aōxō afama mīshtifori fanifo. Nā tii.

Niospa meka fena Jesucristo^{noa}
New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

6c7b7ce2-9d87-5405-91e6-71ce1387adcc